

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquien ambi naidbëdtabi Esuquidistu chuibanquin dada uaid dadpen iquec. ² Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. ³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. ⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. ⁹ Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi

dada uatsaidëmpi abia puduenacsho isacpadec Sacadias puduedpanëdash. ¹⁰ Noadte bëda tauinuc utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹² Adec tabadsho isash dacuëdampambo iquec, quetanec Sacadias uëdëquiampanëdash. ¹³ Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiaish mat-ses dadpen bëdambo iquendac. ¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. ¹⁷ Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmi-aidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac.

Nuquin Icbon matses aido icmenuen min madon chuiba-nendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tanti-ape? Con chidobëdi tsusio budpobi —capanëdash.

¹⁹ Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique.

²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo.

²² Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isacbimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tanti-aquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: — Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

²⁹ Adoaquien Madia, ¿Atotsi quepeba? quequin otacquo tantiec tsadpanëdash. ³⁰ Adec tsadsho isun Cabadedën: —Dacuëndenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Ęmbi tishaid Nuquin Papa yacno yuedanquidquio nec, quequin Esus cuënta. ³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. ³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquio Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷ Utsin nati-

apimbo yaid Nuquin Papan naidquio nec —quepanëdash Cabaded.

³⁸ Adoaquien Madia: —Ai, con Icbon namiaidquio nebi. Ma mimi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash.

⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimi usundoaid adembidi bëdamboshë icmiaidquio nec. ⁴³ Nuquin Icbon tita mibi yec ¿atotsi quiash ëbi isnuec cho? ⁴⁴ Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañdash: “Nuquin Papan naid chuibanu. Tanta.

⁴⁷ Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

⁴⁸⁻⁴⁹ Ëbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu
abentsëquën tabadacimboecnuc adquid tabad-
mendac.

Adenuidi tantiaquin nampidquio abi iquec.

⁵¹ Nadatiambocquin naded-nadedquidquio Nuquin Papa
nec.

Ëmbibi tantiacpadomboen naimbi, quequid icsho isun
Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid
iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bëdamboec tabadte comapenec
bunquiacpaden naquidquio Nuquin Papan icmen-
dac.

Con na ëmbi bedaiduidi tantiec bëdamboec tabadebi que-
quid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac,
quequin ambi tsusedpabo chuimiampicpadom-
boen Nuquin Papan ëbi usundomiac.

⁵⁵ Tsusedpa Abadauambëdta aton tsyuecquidtedi ambi
tantiampicpadomboen Nuquin Papan ëbi usundo-
miac.

Mimbi usundoaid ëbi yacno yuedanquid nec, quequin
Nuquin Papan ambi tantiampicpadembi ëbi isec,”
quec comapenec cuëdënash Madia ënëdpanëdash.

⁵⁶ Adec ënëdash Edisabedbëd ushë daëd nidmec
tabadashic ushë utsi nidbudtsëcnubi aton shubuno
nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada
bacuë tishpanëdash. ⁵⁸ Bacuë tishenquiocboedëmbi nëbi

aton bacuë tishosh, qesho tantiash aton matses ado shubu utsinquadotedi Edisabedbed bédambo icpanédash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiash utsibo chochopanédash. Choash puduedash bacuëmpi aton papa cuëmédquid cuënu quenubi ⁶⁰ Edisabed: —Padenquio. Abi cuëmédquid Uan nec —quepanédash.

⁶¹ Adoquien utsibo: —Min matses utsi Uan cuëmédquid nibëdec —qeshun ⁶² Sacadias ismenuequin médante uic-uiccaquin: —Abi cuëmédquid chui. Tantianu —capanédash utsibon.

⁶³ Adoquien dada uate bedshun, Abi cuëmédquid Uan nec, quequin dada uaquin Sacadiasën ismepanédash.

Adoquien: —¿Abimboda mimbi cape? — quecuededpanédash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibampanédash. ⁶⁵ Aden chuibansho tantiash: —Dacuédampambo iquec. ¿Atotsiepashun onquenquicboedëmbi nëbi onquequin Nuquin Papan naid chuibampec? —quecuededpanédash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanédash.

⁶⁶ Adoac: —¿Mitsipadquidquio aton mado nepec? — quecuededpanédash Sacadiasën mado Nuquin Papan tantiamiaidquio isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chiec onquepanédash:

⁶⁸ “Nuquin Papa isadaidbon Icho nec, quequin chuibanuna.

Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquio isadaidbo iquendac.

⁶⁹ Abi mënchicquid nadatiamboquid nendac.
Tsusedpa Dabidën tsyuecquidquo aid nendac.

⁷⁰ Ambi chuimaidon chiampicpadembi
Nuquin Papan adquidquo icmianac.

⁷¹⁻⁷³ Nuquin tsusedpa Abadauan tantiaquin
Nuquin Papan ambi chiampicpadembi nuquin tsusedpabo
aton tsyuecquidbëdtabi abi chieshënquido
nidtiapimbo yacnombo abi yacno yuedanquid
Nuquin Icbo Abentsëcquiobi nec.

⁷⁴ Abi cudasquin mënchicaid yec dacuëdenquio yec
Nuquin Papan namiaidombo iquendac.

⁷⁵ Adquid yec icsaisa abipadquio bëdamboec tabadquid
icsho
nuqui aidën isendac ënenquiocquin.”

Adec Esus chiec onquiashic nadec aton mado chiec
Sacadias onqueoapanëdash:

⁷⁶ “Adnubien nëbi Nuquin Papan chomiaid chuiban-
quidquio

mibi nec, quequin utsibon mibi cuënendac, mado.
Nuquin Icbo choec, quequin utsibon tantiabicnuc
bëyuc tantiashun abi chuiquidquio mibi iquendac.

⁷⁷ Adquid icquin mibi icsaquid icscho cuidnushe quiash
abided cuidadquid tantiasho isash Nuquin Papa mibi ic-
said tantienquio yec bëpiscudendac,
quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquin
abipadquidquio icsaisa abi yacnoshon chomiaidquio
iquendac.

⁷⁹ Aidën tantiamiac unësash abi iquendac.

Adquid shubu abentsëquën tabadacpadec tabadendac,
quequin mimbi chiendac, mado,”
quec Uanën papa Sacadias Nuquin Papan Mayanën on-
camiac onquepanëdash.

Matses nibëdacno Uan tabadcueniaid

⁸⁰ Adashic, Sacadasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

2

Esus tishaid
(*Mat 1.18-25*)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuipanëdash. ² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

⁴ Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash. ⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash. ⁶ Ambo choquin aton bacuë nuambo usumpanëdash. ⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibë-dacno obeca dadpen pemebanquin buanquido inchëshbudtsëqui choec tabadtuidpanëdash. ⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash. ¹⁰ Dacuëdsho isash: —Chiaid bëda chuinuec chobique. Dacuëdenquiocquin tantiata. Chuinu. Ęmbi chuitequid bëda mibi, Cuishon, quetequid nendac. ¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec nadec cuëdëncuededpanëdash: ¹⁴ “Nuquin Papa abucquio tabadquid abitedi uaquidquio bëdamboshë iquec.

Nuquin Papan bëdamboen isaido ma abëdi tabadpanuna,” quec cuëdëmpañëdash. ¹⁵ Adec cuëdënash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. ¹⁶ Adec nidshun nidaidën capuquidën pete santen bacuë nanacsho istuidpanëdash. ¹⁷ Isanec nidquimbi ambi isboedbëdta ambi tantiaboed chiac ¹⁸ tantiaquidtedi: —¿Midapadquidien capec? —quecuededpanëdash. ¹⁹ Aden

obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepanëdash.

²⁰ Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chi-acpadomboen cuënaid Esus nec, quequin Madian aton mado cuëmpañëdash.

²² Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash. ²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴ Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chi-acpadomboen nanuec aton madobëdi puduedpañëdash.

²⁵ Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpañëdash. Aidi isadaidbo chuiquid dapa abentsëcquiobi cainquidquio icpañëdash. Aidi Nuquin Papan aton Mayan meniaidquio icpañëdash.

²⁶ Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bédamboen isaidquio choacsho unësabicquin isendambi, quequin tantiapanëdash. ²⁷ Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. ²⁸ Esus bësho isun Simeyonën Esus bedshun icucquin Nuquin Papan naid naden chuibanpanëdash:

²⁹⁻³⁰ “Abitedishun Icbo icquin mimbi ëndenquio chiampid nëbi nëid isembi.

Nëid isash unësmane quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

³² Nëidëmbi mimbi tantiacpaden chuibanquin isadaidbo bédambo icmendac,”
quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. ³⁴ Esus chuibanquin naimbudshun Osebëdta Madia chiec Simeyon: —Bédambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuiopanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bédambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpenshun icsamboen chuided-chuidedendac. ³⁵ Adsho ambi ompoquin naid icsabëdta ambi tantiaid icsa tantiamequid min

mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënën bedac abëdi seta 7ted matamiash tabadnubi ³⁷ aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenepanëdash. ³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash. ⁴⁰ Ambo tabadnubi aton bacuë Esus dada bëdambo yec canicuempanëdash. Aidi comapenen tantiaquidquio Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ęm̄bi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setan-setanquiec nidtenepanëdash. ⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³ Adec ambo nidashic nami uabicquid petequid tantiaid ushëtedi

tantieci tabadtenepanëdash. ⁴⁴ Adec ambo tabadquin nainash Esus ambobi icnubi tantienquo yec Madia Os-ebëd auëshquo nidoapanëdash. Adec nidash inchëshbudtsëqui abëd chobedo yacno capuquin Esus nibëmbenepanëdash. ⁴⁵ Aden nibënquin istuidabi yec Edu-saden yacno padpidec nidoapanëdash. ⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd on-quecuededsho istuidpanëdash. ⁴⁷ Adec onquec tsadsho isquin, Bëdamboen tantiaquin chuibanquidquo nëid nec, quequin utsibon tantiabededpanëdash. ⁴⁸ Adnubien, ¿Mitsipadquid con mado nepec? quequin otacquo Madi-
dian tantiapanëdash. Aden tantiequi: —¿Atotsi quiash ëbi daëdi tantienquo yec nëmbo choash mibi tabade, mado? Unësqiocrin papabëdtambi mibi nibëmbeniombi —
capanëdash anin.

⁴⁹ Adoquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantien-
quioda mimi icpe? ⁵⁰ Aden Esusën chuisho anibëdtan Osen tantienquocrinpanëdash.

⁵¹ Adashien: —Nidnu. Nid, mado —anin cac cacuidenquo yec Nasaded yacno anibëdi choash tabadquin Madi-
dian chiaidbëdta Osen chiaid tantiaquin Esusën nadenepanëdash. Adec tabadnubi aton titan ambi isboedbëdta ambi tantienquo yaid bëpiscudenquocrin
tantiadenepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën
isbededpanëdash.

3

*Esus choec, quequin Uan mentoanquidën chiaid**(Mat 3.1-12; Mad 1.1-8; Uan 1.19-28)*

¹ Adashic, seta 15ted matamec Tibedio Sesad cuëmédquid, Doma yacno tabadequi abitedi ancaquid dapa, empedadod caid icpanédash. Aidi Doma yacnocquido ancaquid dapa icnubien Ponsio Pidato cuëmédquid, nidaid Udeya caid yacnocquido ancaquid, cobednadod caid icpanédash. Aid daéd ancanquid icnubien Edodes cuëmédquid, nidaid Cadidia caid yacnocquido ancaquid, cobednadod caidbidi icpanédash. Ancanquid aitedi icnubien Edodesën utsi, Uedipe cuëmédquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanédash. Ancanquid aitedi icnubien Disanias cuëmédquid nidaid Abidinia caid yacnocquido ancanquid cobednadod caid icpanédash. ² Ancanquid aitedi icnubien Anasbëdi Caipas isadaidbo tsusio dapabo icpanédash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ęmbi chiaid chuibanta, capanédash. ³ Adoac acte Odan caid cuëmano capuquimbi naden chuibampanédash. Mimbi tantiaid icsa ënta. Aden ënsho isun mimbi icsambocquin naboed tantienquio yacbimboen Nuquin Papan mibi bëdamboen isendac. Ęmbi tantiaid icsa nainquiocquin ënu, mibi qesho tantishun mibi acten mentono, quequin cho-choquid cho-choquidquien Uanën chuidednëpanédash.

⁴ Ęndenquimbo Nuquin Papan tantiamiac Isayasën Uan chuiquin dada uampicpadequi Uan icpanédash. Naden Isayasën Uan chuiquin dada uapampic:
 “Matses nibëdacnombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquio chosho isnu quequin cuembocnoc andëdshun

ambescabanacimboen abimbo chuiquidënquio chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”

quequin Isayasën Uan tishabicnuc chuiquin dada ua-pampid nec.

⁷ Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe queshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho?

⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan.

⁹ Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, queshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? — quepanëdash iccuededquido.

¹¹ Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen acten mentomenuec chochopanëdash. Choshon Uanën chuibansho tantiash: —Chian anëdënquequid nësiate ictiapimbocquin ¿atotsimbi napeba? —quepanëdash.

¹³ Adoaquien: —Ancanquid dapan chiactedsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵ Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? — quecuededpanëdash cho-choquido.

¹⁶ Adsho tantiash: —Mibi acten mentoquidquid nebi. Padnuen ëbipadquidpenquo nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquid Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquidquid icmendac aton Mayanën. Adoac ënsho isun

pauquendac —quepanëdash Uan. ¹⁷ Aden chuibanec nadpanëdash: —Piacbo ëshë uashun bitsi secatanquin nêdëncashun ëshë icbon dayun uacpadomboen abi tantiesa cuëshëdmeshun chian anêdënquequid nêsiashun abi tantiaquidtedi abi yacno puduedmendac aidën. ¹⁸ Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibanpanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash. ²⁰ Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid
(*Mat 3.13-17; Mad 1.9-11*)

²¹ Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec ²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi
(*Mat 1.1-17*)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiaash, Nuquin Papan

madeo nec, quenquo yec matses onquepanédash. Esusën papapenquo Ose icnédash. Madia aton tita icbo icnuc Esusën tsusedpabo nēidtedi iquec: aton buchido Edi cuëmédquid icpanédash. ²⁴ Aidën papabic Matak cuëmédquid, aidën papabic Debi cuëmédquid, aidën papabic Ana cuëmédquid, aidën papabic Ose cuëmédquid, ²⁵ aidën papabic Matatias cuëmédquid, aidën papabic Amos cuëmédquid, aidën papabic Naun cuëmédquid, aidën papabic Esdi cuëmédquid, aidën papabic Nacai cuëmédquid, ²⁶ aidën papabic Mac cuëmédquid, aidën papabic Matatias cuëmédquid, aidën papabic Semei cuëmédquid, aidën papabic Ose cuëmédquid, aidën papabic Uda cuëmédquid, ²⁷ aidën papabic Uana cuëmédquid, aidën papabic Desa cuëmédquid, aidën papabic Sodobabed cuëmédquid, aidën papabic Sadatied cuëmédquid, aidën papabic Nedi cuëmédquid, ²⁸ aidën papabic Medqui cuëmédquid, aidën papabic Adi cuëmédquid, aidën papabic Cosan cuëmédquid, aidën papabic Edmodan cuëmédquid, aidën papabic Ed cuëmédquid, ²⁹ aidën papabic Osue cuëmédquid, aidën papabic Ediesed cuëmédquid, aidën papabic Odin cuëmédquid, aidën papabic Matak cuëmédquid, ³⁰ aidën papabic Debi cuëmédquid, aidën papabic Simeyon cuëmédquid, aidën papabic Uda cuëmédquid, aidën papabic Ose cuëmédquid, aidën papabic Onan cuëmédquid, aidën papabic Ediaquin cuëmédquid, ³¹ aidën papabic Medeya cuëmédquid, aidën papabic Menan cuëmédquid, aidën papabic Matata cuëmédquid, aidën papabic Natan cuëmédquid, ³² aidën papabic Dabid cuëmédquid, aidën papabic Isai cuëmédquid, aidën papabic Obed cuëmédquid, aidën papabic Bos cuëmédquid, aidën papabic Sadomon cuëmédquid, aidën papabic Nason cuëmédquid, ³³ aidën papabic

Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, ³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, ³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, ³⁶ aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid, ³⁷ aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid, ³⁸ aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquio nec. Abi tabadec. Aidedi Esusën tsusedpabo nec.

4

Satanas Esus icsamete bunaid (*Mat 4.1-11; Mad 1.12-13*)

¹ Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoaquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. ² Ushë utsi nidash utsi choaid abuctotsëcquiecnuc ambobi tsadpanëdash. Aidedi ushquin penquio yash Esus bundopanëdash.

³ Bundoacscho isash Nuquin Papa chieshënquid choash Satanäs nadpanëdash: —Nuquin Papan madombo icquin penun cuënotebi pete icta cata —capanëdash Satanäsën Esus chuiquin.

⁴ Adoaquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanäs caic.

⁵ Adoshombic, macuësh dapa abucquio yacno Esus buanshun Satanäsën badedquio nidaidtedi ismebampanëdash. ⁶ Ismiash: —Nidaidën icquidtedishun icbo icmiaidquio nebi. Abitedi con na nec. Ęmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. ⁷ Nidaidën tabadquidtedi chuiquid dapa icnu quequin, Con icbo mibi nec, ěbi casho adquid mibi icmambi —quepanëdash Satanäs Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidën nami-aidquio icta” —quepanëdash Esus Satanäs caic.

⁹ Adoshombic Edusaden yacno Esus buanshun Satanäsën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta. ¹⁰ Naden dada uapampid iqueque. Tantia. Chuinu.

“Mibi pudunsho isun, Tscatequin bëdamboen budmeta, quequin Nuquin Papan ambi uaido mayan bëdabo chiendac.

¹¹ Aidombi min taën tsasimbocquid tincanushe qeshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanäsën Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec — quepanëdash Esus Satanas caic.

¹³ Aden chiaquien Satanasën Esus icsamboen nomenclu tanquin naimbudpanëdash. Aden naimbudequi, Padpidemboen ëmbi chiaid nomencluquin Esus tanun nanuna, quequin ambibi tantianec Esus nianec Satanas nidpanëdash.

Nasaded yacnocquido Esus bunesabo

(Mat 4.12-17; 13.53-58; Mad 1.14-15; 6.1-6)

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. ¹⁵ Adnubic, Nuquin Papan chiaid chuibante shubu utsin-utsinquiecu puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquio Esus nec, quecuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash. ¹⁷ Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:

¹⁸ “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaïdo ambi tantiaid icsa ëmencu chuibanta caidquio nebi. Aidëmbidi Satanasën yuaid Nuquin

Papan bacuë icmenuequin chuibanta caidquio nebi.

¹⁹ Aidën Nuquin Icbon bēdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanēdash Esus. Adec tsadsho shubu nuntan icquidtedishun bēisbededpanēdash. ²¹ Adoac: —Nuquin Papan chiaid mimbi tantiaboed nēbimbobi tauadoec —quepanēdash Esus abibi chiadequi.

²² Adoquien: —Bēdamboen chuipec. ¿Mitsipaden tantiaid ambi chiaid nepeba? —quecuededpanēdash. Adec onqueboedobi: —¿Osen mado Esus nenquioda ictic? —queoapanēdash.

²³ Adoquien: —Bēdamequid yequi abibi daicsambo yanash bēdamiadacsho isash, Bēdamequidquio nec, quequin matsesën tantiapec, quequin chuiampid nec. Ēmbi Capednaun yacnoshon nabambocpadomboen nēshuntsen nabansho isun, Nadatiambocquin nabanquid nec, quequin mibitedishun tantiapec. ²⁴ Abimbo chiembique. Tantiata —quiash Esus abi onquec: —Nuquin Papan ěmbi tantiamiacpaden chuibanta caidën abi caniacnoshon chuibansho tantienquiocquid icpec. ²⁵ Ēndenquimboshë adomboembidi Nuquin Papan ěmbi tantiamiacpaden chuibanta caid Edias cuēmēdquidën chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēcñuc matamec aton pete nibēdquiec yanubi isadaidbon bēnuabo bunec tabadpampic. ²⁶ Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenuc nidta cac Edias nidshun ambi chiacpadomboen isadaidpembon bēnuan nanuc aton pete uesadenquiocpampic. Aid chido shubu dadpen icquid

Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. ²⁷ Adashic, adecbidi isadaidbo abi daushumbo yacno mishac mishadenquio yac bimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembo abentsëc Naman cuëmëdquid Ediseyon bëdamepampic. Èbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

²⁸ Aden Esusën isadaidpembo nashumpampid chuisho tantiasch iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. ²⁹ Adec nëishash nidanec nuntanuësh puduenanec shubu ënëdacno nidshun acte dapa quiusudacnombo nebudnuequin Esus buampanëdash. ³⁰ Aden nidmiaquien matses dadpen icquid nat-susash Esus nidpanëdash.

Mayan icsa dapuedaid cuemete
(Mad 1.21-28)

³¹ Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Papan chiaid chuibanpanëdash. ³² Aden chuiban-sho tantiasch: —Ambia tantiaquidën chiacpaden chuibanquidien Esus nechitec —quecuededpanëdash anocquido.

³³ Aden Esusën chuibanubien Nuquin Papan chiaid chuibante shubu nuntan mayan icsa dapuedaid icpanëdash. Aidi comapenec sidquetanec onquec: ³⁴ — ¿Nasaded yacnocquid Esus caid atotsi quec mibi cho? ¿Èbipadquidtedi naimbudmenuecta cho? Èmbi isaid mibi

nec. Nuquin Papan bédamboen isaidquio, icsapenquioc-
quidquio mibi nec —mayan icsan caquien: ³⁵ —Otaquio
tabad. Adec tabadec dapuduenta —Esusën cac mayan
icsan abi dapuduedaid tacpanën nebudec icsa uainquio
yec dapuduempanédash.

³⁶ Adosho isash tantiadempambo iquequi: —¿Chuiquid
dapan chuitequidta neque? Tantiabono. Nadati-
ambocquin chuibanac mayan icsabo dapuduenchitequien
nec —quepanédash Capednaun yacnocquido. ³⁷ Aden
tantiaquin Esusën mayan icsa dapuduemiosh, quequin
isquidon chuiban-chuibanac Capednaun yacno dëue-
quidtedishuntsen tantiapanédash.

Daicsambocquid dadpen Esusën bédamiaid

(Mat 8.14-17; Mad 1.29-34)

³⁸ Mayan icsa dapuduemiashic Nuquin Papan chiaid
chuibante shubu yacnoësh puduenanec Simonën shubu
yacno Esus nidpanédash. Ambo puduedacsho isun: —
Simonën nachi chumboshë iqueque. ¿Ada aid bédamet-
sia? —caquien:

³⁹ Simonën nachi yacno choash dayunquio nidtu-
idec: —Chumbocquid daebudta —Esus quenubi bad-
edquio daebudpanédash. Adec daebudash nidtoshon
codocashun Esusbéd icquido pemepanédash Simonën
nacin.

⁴⁰ Adshumbic, inchëshbudtsëqui daicsaid utsi-utsien
bë-bëpanédash. Aden bë-bësho isun damishquin Esusën
bédamepanédash. ⁴¹ Adembidi mayan icsa utsi-utsien
dapuduemepanédash. Adoac, Nuquin Papan madombobi
mibi nec, quec sidquesho tantiashun: —Nuquin Papan
chomiaid nec, quequin ëbi chiec adec onquenda —Esusën
cac mayan icsa ënédpanédash.

⁴² Adashic, badiadnuc matses nibédacno Esus nidpanë-
dash. Esus nidacsho isun matses dadpenshun nibënquin

istuidshun: —Nidenquo yec ëbëdi tabadta —capanëdash istuidquidon.

⁴³ Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono —quepanëdash Esus abi nibëinquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

Abëd tabadmenuen chomiaid (Mat 4.18-22; Mad 1.16-20)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccued-edquido dadpen tabadpanëdash. ² Adnubien masi yacno aton cano daëd nëshun icbon aton nëshaidtedi pambampanëdash. ³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵ Adoaquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tēsēdec taëpanēdash. ⁷ Adsho isun abēdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanēdash.

⁸ Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanēdash Esus chuiquin. ⁹ Abëd icquidobēdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanēdash Petedo. ¹⁰ Acobo Uan chedo tantiadempambo yec tabadoapanēdash. Aid daëdi Sebedeyon mado icpanēdash.

Adec Petedo shuebudash onquesho tantiatanec Esus nadpanēdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanēdash Esus Petedo caic. ¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abēdtan nuëcquid bedboedobēdtan Petedon Esus nidsho tsi-banampanēdash.

Daushumbocquid bēdamiaid

(Mat 8.1-4; Mad 1.40-45)

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanēdash. Aidi choash Esusën taëno shuebudec nadpanēdash: —Ëbi bēdamete bunquin ëbi mimbi bēdamepec —quepanēdash daushumbocquid.

¹³ Adsho tantiashun adquid daushumbocquid mishtemaid nec, quenquiocquin damishec Esus: — Mibi bēdamete bunebique. Mibi bēdamenu —quenubi badedquio bēdampanēdash.

¹⁴ Aden bēdametanec Esus: —Ĕmbi naid utsibo chienda. Adenquiocquin isadaidbo tsusiobo ismetanta ma bēdami-aid Nuquin Papan naid nec quequin ma aidon tantia-panu. Aido ismeshun Nuquin Papan ambi chiaid Moises dada uamiampicpadembi bēdambo icmiaid cuidtequidquio meneta —capanēdash Esusën ambi bēdameboed chuiquin.

¹⁵ Adnubien Esusën bēdamesho isquidon Esusën bēdami-aid chuibanac matses dadpen Esusën chiaid tantianuec cho-chopanēdash. Adecbidi, daicsambocquido bēdanuec cho-choacsho Esusën bēdamepanēdash. ¹⁶ Adashien matses nibēdacnombo nidash Nuquin Papa chiec onquepanēdash.

Dada shēquēquenquiocquid bēdami-aid

(Mat 9.1-8; Mad 2.1-12)

¹⁷ Adashic, ushē utsin Esusën chuibanuc padiseyobobēdi Nuquin Papan naden nata quequin chiaid tantiamequid dadpen tabadpanēdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshē yacnoësh cho-chopanēdash. Adec aido cho-choash tabadnubien Nuquin Papan nadatambocquin naquid icmiac matses bēdamenuc Esus icpanēdash. ¹⁸ Aid icnubien dada shēquēquenquiocquid aton din nandoshon aton utsibon bēpanēdash. Aden bēquin shubu nuntan nēnantanquio Esus icnubi ¹⁹ matses tsucus-tsucustsēcquiocsho isash puduedtiapimbo yec macano pada-padapambo yacno dada shēquēquenquiocquid buanec dectatoshon macano

chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquo yec bëpiscudtequidquo mibi nendac —quepanëdash Esus.

²¹ Aden chuisho tantiaash padiseyobobëd Nuquin Papan naden nata quequin chiaid tantiaequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquo yec bëpiscudquidquo nec —quepanëdash ambibi tantiacpadec onquec.

²² Aidon tantiaid tantiec Esus: —¿Atotsi quiaash mimibi icsamboen tantiec onquepe? ²³ ¿Mimbi tantiaid icsa cuidenquo yec bëpiscudtequidquo nendac ëmbi chiaidquo bédantequidpenda nedic? Adecbidi, ¿Mibi icsamboeboedi mibi bédanoque. Nidtoash nidta, quequin chiaid bédantequidpenda nedic? ²⁴ Nuquin Papan chomiaid icquimbi mimbi tantiaid icsa cuidenquo yec bëpiscudtequidquo nendac ëmbi cac ad iquendac. Nuquin Papan chuimiaidquo nec mibitedi camenuen dada shëquëquenquiocquid naden chiembique Tantia. Nidtoash nidquin min di buanec nid —capanëdash Esusën dada shëquëquenquiocquid chuiquin. ²⁵ Adoac nidtoshon aton di bedanec Nuquin Papan naboed chuibanequi aton shubuno nidpanëdash.

²⁶ Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquicboedëmbi nëbimbobi aid isbempombi —quecuededpanëdash.

Debi, ëbi tsibanec cho, quequin Esusën chiaid
(*Mat 9.9-13; Mad 2.13-17*)

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac ²⁸ Debi nidtoanec aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. ³⁰ Aden adquidobëdttan Esusën pesho isash padiseyobo: —¿Atotsieshun mibi chuiquidbëdttan mibitedishun icsambocquidbëdttan pepeba? —quepanëdash Esusbëd icquido caic.

³¹ Aden chuisho tantiaash Esus nadpanëdash: —Ëbi bëdamec cho, quenquio bëdambocquid iquec. Daicsambocquidien, Ëbi bëdamec cho, quendac. ³² Adecbidi, Nuquin Papan bëdamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

Buna mëmunaid
(*Mat 9.14-17; Mad 2.18-22*)

³³ Aden Esusën chuibansho tantiaashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec.

Adenquio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec. ³⁵ Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanequi abi Esus onquec: —Dashcute chuca cuëshun dashcute shë nibëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. ³⁷ Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. ³⁸ Adembidi, ëmbi ënden tantiaiduidi tantianu, quequin Nuquin Papan nëbi chiaid pausdtequid bëda tantiaidquid yanec icsabudendac. Mibi adquid iquec, quequin tantiaquin utsi chiacbimboen Esusën padiseyobo chuipanëdash. ³⁹ Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

6

Chonoadtemaid ushë tantiaquid

(Mat 12.1-8; Mad 2.23-28)

¹ Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. ² Aden pesho isquin padiseyobon: —¿Atotsieshun

chonoadtemaid ushën chonoadpeque? Tantianu. Ĕbi chui —capanëdash Esusbëd icquido chuiquin.

³ Adoaquien: —¿Tsusedpa Dabid caidbëd icquidon pi-asquin pepampid tantiamboda ique? ⁴ Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: ⁵ —Ĕbia: Tiboquenu, quiash tsadac-padec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

Mëuesadaid bëdamiaid
(*Mat 12.9-14; Mad 3.1-6*)

⁶ Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash.

⁷ Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. ⁸ Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

⁹ Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? — quepanëdash Esus.

¹⁰ Aden chuishumbic iccuededquido isbanquin: —Ëbi mēd —cac Esus mēdequi mēuesadaid bēdampanēdash.

¹¹ Adec mēuesadaid bēdansho isashien comapenec nēishash: —¿Mitsipadentsimbi Esus acpe? —quec onquecuededpanēdash abi chieshēnquido.

Esusēn, Ëbi chuibeneta, caido
(*Mat 10.1-4; Mad 3.13-19*)

¹² Adashic, ushē utsin macuēsh yacno matses nibēdacno Nuquin Papa chiec onquenuc nidash inchēshēn ushenquio yec Nuquin Papa chiec Esus onquepanēdash. ¹³ Badiadshun abēd icquido dadpen chomeshun, Ëbi chuibeneta, quequin 12tedictsēqui chuipanēdash.

¹⁴ Nēidic, Simon, Esusēn Petedo caid; utsibic, Andedes, Simonēn utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵ utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶ utsibic, Udas, Acobon mado; utsibic, Udas Iscadote, yuecshun Esus chieshēnquido Esus bedmequid. Aidtedi, Esusēn, Ëbi chuibeneta, caido icpanēdash.

Nuquin Papan bēdamboen isaido icnuc ambi icsamboen isaido

(*Mat 4.23-25; 5.1-12*)

¹⁷ Adashic macuēsh yacnoēsh abēd 12ted icquido padadambo yacno budash abi tsibanquido dadpen icsho isash Esus nidtuidpanēdash. Nēidted icpanēdash: Nēidic, Edusaden yacnoēsh choquido; utsibic, Acte Dapa cuēman shubu dadpen icquid Tido caid yacnoēsh choquido; utsibic, Sidon caid yacnoēsh choquido. Aido Esusēn chuibansho tantianuec cho-choash tabadnubi, Ëbi bēdamepec, quequin tantiec utsibo choash tabadpanēdash. ¹⁸ Adec choquido mayan icsa dapuduedaid icsho isun Esusēn dapuduemepanēdash. ¹⁹ Adsho isun nadatiambocquid Esus

neque. Mishnu, qeshun mishequi bédancuededpanëdash.

²⁰ Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bédamboen isaïdo iquec abuc nidan con natedi mitsana nendac.

²¹ “Nëuëshquio bundodenesho isun Nuquin Papan bédamboen isaïdo yec abuc ëbëd tabadec bundoesa iquendac.

“Nëuëshquio matses Nuquin Papan chiaïd tantiesa icsho isash unësquio yec shubidednequid Nuquin Papan bédamboen isaïd yec abuc nidash ëbëd tabadec bédambo iquebi quependac adquido.

²² “Esus tantiaquid icsho chieshënquin pudued cainquio yaid adembidi mua uaquin chuishunaïd Nuquin Papan bédamboen isaïdquid nec.

²³ “Adomboembidi ëmbi ëndenquimbo chuimiaïd aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaïdëshun adoaid iquec Nuquin Papa yacno choacsho ambi bédambo icmiaïd mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴ “Padnuen, con na dadpen iquec, quequin tantiec bédamboec tabadebi, qesho Nuquin Papan icsamboen isaïdo mibi nec. Nidaïdëshun mimbi bedteni-aiduidi tantiec Nuquin Papa yacno puduedtiapimboquid mibi iquendac. Nidaïdën bédamboec tabadquin ënden bedondaidi mibi nec.

²⁵ “Nidaïdëshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶ “Bëdambocquid nec, quequin mibi dadpenshun chuisho tantienda. Adomboembidi mua uain Nuquin Papan ëndenquimbo chuimiaidpembon chuiampic. Aidon chiaid tantiashun tsusedpabon Nuquin Papan chiaid tantienquo yanampic. Adquido Nuquin Papan icsamboen isaido nec —quepanëdash Esus.

Mibi uimanënquido tantiaquin nabanta, quiaid
(*Mat 5.38-48; 7.12*)

²⁷ Aden chiashic abi Esus onquec: —Ëmbi chiaid tanti-aquidquido nad iqueque. Chuinu. Tantiata. Mibi chieshënquido bëdamboen tantiaquin nabanta. ²⁸ Adembidi mibi icsamboen chuiquid bëdamboen chuita. Adembidi, ëbi icsamboen naquido bëdamboen tantiaquin cuidenda, Papa, quequin Nuquin Papa chuita. ²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. ³⁰ Utsibic, aton na nibëdquid, Bec cho, qesho meneta. Adembidi utsin mitsana ampesho isun cuidenquiocquin bëdamboen naoata. ³¹ Adembidi ëbi bëdamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ëbëd tantiananquiduidi tantianu, quec ¿bëdamboda mibi icpe? Padenquo. Adembidi Esus tantiesan abipadquiocquido tantiec. ³³ Adecbidi, Ëbi bëdamboen tantiaquin nashunquiduidi tantiaquin nashunoanu quec ¿bëdamboda mibi icpe? Padenquo. Esus tantiesan adembidi nashunquidquido nec. ³⁴ Adecbidi, Ëbi menequiduidi menenu, quec ¿bëdamboda mibi icpe? Padenquo. Esus

tantiasan adenuidi menec. ³⁵ Naden nata, quequin chuinu. Tantia. Mibi chieshënquid icsho aid tantiaquin bëdamboen nabanta. Adembidi mibi meniantiapimboquid, Bec cho, qesho, Yucash cuidnanun nanuna, quenquiocquin meneta. Mimbi adosho isun Nuquin Papan mibi bëdamboen isendac. Adobanec bëdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. ³⁶ Nuquin Papan abi chieshënquido nashundeniacpadomboen mibi chieshënquido nashundeneta —quepanëdash Esus.

*Icsambocquid nec, quequin chienda, quiaid
(Mat 7.1-5)*

³⁷ Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bëdambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bëpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bëpiscudendac. ³⁸ Aton na nibëdquid bëdamboen tantiaquin meneta. Adembidi, mibi tantiaquin abi utsibëd bëdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bëdamboen tabadmetequid daëd uashun Nuquin Papan mibi meneoaindac —quepanëdash Esus.

³⁹ Aden chuishumbic utsin tantienquio ictequid abëd icquido naden Esusën chuipanëdash: —¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash.

⁴⁰ Adembidi tantianuequidën abi tantiamequid dëniac-tiapimbo iquec. Tantiamic abi tantiamequidpadquid iquendac —quepanëdash Esus.

⁴¹ Adoshombic adembi tantiamequin naden Esusën chuipanëdash: —¿Atotsi quiash utsi bëtsiadaid pistsëc-quid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe?

⁴² Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacobimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

Cuëte abipadquid aton bacuë nec, quequin chiaid
(Mat 7.17-20; 12.34-35)

⁴³ Adoshombic, adembidi Esusën chuipanëdash: — Cuëte bëdan bacuë adquiobidi bacuëec. Cuëte icsan bacuë adquiobidi bacuëoac. ⁴⁴ Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquo matses iquec. Adecbidi, echo bacuë isash, Bata nec, quenquo matses icoaic. ⁴⁵ Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

Tantiaquidquo icnuc tantiauidquid nec, quequin chiaid
(Mat 7.24-27)

⁴⁶ Adoshombic: —¿Atotsieshun, Con Icbo mibi nec, qeshumbi ëmbi chiacpadomboen naisa mibi ne? ⁴⁷ Èbi

yacno choshon ëmbi chuibansho tantiaquiash nidshun nadomboen naquidquio iqueque. Chuinu. Tantiata.
⁴⁸ Cunquequid dapan chimeshnushe queshun shubu uaquidën shëcuë ëquëduc uëdëshcashun buintad nitsinquid. Adembidi, natiastianquiec cametequid yanabicnuc tantesa uainquiocnuen ëbi tantiaquidquio icquin ëmbi chiaid papuduedshun adomboembidi nabanquid nec. Adquidën tantesa uainquio iquendac. ⁴⁹ Utsibic nad iqueque. Tantia. Ëquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquio yec natiastianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Esus.

7

Sondado chuiquidën tantiaid

(Mat 8.5-13)

¹ Aden iccuededquido chuiquin nainash Capednaun caid yacno Esus nidoapanëdash. ² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadtsëcquio icpanëdash. ³ Aton yua unëstiadtsëcquio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadtsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi

chiacpadomboen aton yua bédametiadquidi mibi nec — quepanédash isadaidbo tsusiobo Esus caic.

Adoac aidobëdi Esus nidpanédash. ⁶ Adec aidobëd Esus nidshobi sondado chuiquidën chomiaid utsibo choquin bëquedtuiddash nadpanédash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icbo. Icsambocquid nebique. Mibi bédambocquid iquec con shubun puduedenquioc-tiadquidi mibi nec. ⁷ Èbi icsambocquid iquec mibi bëquedec nidenquioccobi. Mibi bédamequid yec con shubun puduedenquiocquin mibi yacnoshombi, Bédanta, mimbi cac con yua bédampec. ⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, èmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuipombi —quepanédash sondado chuiquidën chuitan caido Esus caic.

⁹ Adoaquien: —¿Abimbobida cai? —queshun ambi chiaid tantiamenuquin iccuededquido Esusën bëisbanquin nadopanédash: —Chuinu. Tantiata. Sondado chuiquid isadaidpembo èbi tantiaquidpadquid isadaidbo nibëdec —quepanédash Esus. ¹⁰ Aden chiaquien sondado chuiquidën chuitan caido aucbidi nidoash shubun puduedshun sondado chuiquidën yua bédamiaid istuidpanédash.

Nianten mado uincuen uaid

¹¹ Adashic, ushë utsin shubu dadpen icquid Nain caid yacno Esus nidpanédash. Aidbëdi abëd icquido nidpanédash. Adecbidi matses utsibo dadpen nidpanédash. ¹² Adec nidequi Nain tsasi uaid quënë shëcuë anoentsëqui choquimbi unësaid bëquido bëquedtuiddash. Unësaid epa icnubi ani niante icpanédash. Niantebëd Nain

yacnoquido dadpen cho-chopanëdash. ¹³ Adec cho-choec niante shubisho isash Esus unësquio yec: — Shubienquio yec ënëd —quepanëdash. ¹⁴ Adec, Ënëd, quetanec udictsëc nidshun unësaid nanaid Esusën mish-nubi abi bëquido nidtuidpanëdash. Nidtuidsho isun: — Abuido, uëtsëdtota —cac ¹⁵ uëdtsëdtoash tsadec unësboed onquepanëdash. Adsho isash ani caic: —Në, unësboedi min mado uincuenoshe. Abëdi nidec nid —capanëdash Esusën.

¹⁶ Aden unësaid uincuemesho isash cho-choquido: — Adopenshenda uincuemec —queshun Nuquin Papan naid chuibanpanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmiosh —quec isquido onquecuededpanëdash.

¹⁷ Aden isash nidshun unësaid uincuemiaid isquidon chuibansho isadaidbon nidaid Udeya caid yacnoquidon tantiabempanëdash. Adembidi chiac dëuequidontsen tantiapanëdash.

*Ëbitedishun cainaid mibi nec, quequin Uanën chiaid
(Mat 11.2-19)*

¹⁸ Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibanpanëdash. Adoaquien abëd icquido daëd chomeshun Uanën nadopanëdash: ¹⁹ —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰ Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi

quenuc ¿Adambi utsi caimpe?” quiosh Uan — quepanëdash Uanën chomiaido Esus caic.

²¹ Aden chiaquien icsambocquid bédamequinc, mayan icsa dapuduedaid dapuduemequinc, bëshuaid bédamequinc caquin Esusën ismebampanëdash. ²² Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. ²³ Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

²⁴ Adashic, Uanën chomiaido nidambi iccuededquido tantiamebanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ish-cunaid isnuecta nidtionda? ²⁵ ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. ²⁶ Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. ²⁷ Ëbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

²⁸ “Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbite-dishun cainaid mibida ne, quepec —quepanëdash Esus.

²⁹ Aden Esusën chuibansho tantiash: —Nuquin Papan naid bëdambo iquec —quepanëdash Uanën mento-banondaido. ³⁰ Utsiboen ambi tantiaid icsa ënenquio icquin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

³¹ Aden Uan chiash Esus: —¿Nuquin Papan chiaid nëbi chuisho tantiesa mitsipadquid nepeque? ³² Adquid chuinu. Tantia. Ambi tantiacpaden naisa icsho isash bacuëbo yacbimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquidën Nuquin Papan chuimiaidën nabansho icsamboen ispec. ³³ Nua cubudquin pesa Uan icsho isash, Mayan icsa dapuduedaid nec, queposh Uanën chuisho tantiesa. ³⁴ Ëmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. ³⁵ Aden tantienquiocquid, Bëdamboen tantianu, queshun bëdamboen tantiaquidënquio chuibansho tantiash abi tantiamequidpadquid iquendac —quepanëdash Esus.

Chidon Esus tanoshcaid

³⁶ Adashic, Ëbi yacno pec cho, padiseyobo abentsëcshun cac aidbëd nidash shubun puduedash pete santen cuëshnudash Esus uepanëdash. ³⁷ Adec Esus puduedash

uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. ³⁸ Aden bëequi Esus yuedacno choash puduedshun abi bëdamequid Esus istuidash, Ębi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bëdan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

³⁹ Chidon adosho isash Esus yuedquid, Simon caid, abibi onquec: “Ęmbi yuedaid Nuquin Papan chuimaid iquec, Ębi mishquid icsambocquid nec,” quequin chido mishmenquio icpec, quepanëdash Simon.

⁴⁰ Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanëdash.

Adoaquien: —Aden chuiban. Tantuanu —quepanëdash Simon.

⁴¹ Aden tantiaishun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpectsëc bedshumpondash. ⁴² Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquio icpec? —quepanëdash Esus Simon caic.

⁴³ Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bēdamboen tantiaquin mimbi chioc —quiash ⁴⁴ Simon ismenuec Esus chido yacmi bidiadshun naden chuipanēdash: —Min shubun puduedacsho mimbi taë pante ëbi menenquioccoc. ¿Nēid chido isquindactio? Aidēmbien aton bēunēn taë chucu uashun aton manēdaidēn con taë bēchishaid ucposh. ⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nēid chidon ëbi tantiaquioquin yuen con taë tachoccaniosh. ⁴⁶ Bēchin manoshcanesa mibi iccoc. Padnueni nēid chidombi noadte bēdan tanoshcaniosh. ⁴⁷ Adembidi mibi chiembique. Tantiata. Mayan icsa dadpeshun tantiamiaid icsho nēid chido bēdamepombi. Aden bēdamiashic abi icsaid tantienquo yec bēpiscudpobi. Ĕmbi aden nac ëbi comapenen tantiaquioquin ëbi nashunquidquo nēid chido nec. Padnuen utsi icsaid daēdpactsēc mibi icsaidtedtsēcibidi icpec. Adquid icsaid bēpiscudebi ëbi quenuc ëbi bēdiactsēc tantiatsec mibi nashumēnec —quepanēdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yac bimboecquid mibi isembi —quepanēdash Esus chido chuioaic.

⁴⁹ Adsho tantiash: —Icsainquo yac bimboecquid mibi isembi, quec ¿mitsipadquid Esus nepec? —quepanēdash iccuededquido. ⁵⁰ Aden iccuededquidon tantianubi chido caic Esus: —Ĕbi tantiaquid yec Nuquin Papa yacno puduedquid mibi neyoc. Bēdamboec tabadaid tantiamiaid mibi iqueque. Dacuēdenquo yec nidta —quepanēdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno

shubu abentsëqui yacbimboec nidaidën tabadaid chuibenepanëdash. Abi bédamequid tsibananec chidobo nidpanëdash. ² Ambi mayan icsa dapuduemiaidobëdtan ambi bédamiaidon Esus tsibanampanëdash. Madia, Macada yacnoshon tishaid chedon Esus tsibampanëdash. Mayan icsa 7ted dapuduemiaid Madia icpanëdash. ³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat 13.1-23; Mad 4.1-20)

⁴ Aden chuibenias tabadtuidtsëcnubi ambi chuiquin tantiamboedo cho-choquin tsibanampanëdash. Chochosho isun, Mibibimboecnuc chiemi, quenquiocquin Esusën nadopanëdash: ⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. ⁷ Utsibic, nisanquid dëyucacno secac aibëdi dëyucash canidouidsacsho nisanquidën bëtinac unësquid. ⁸ Utsibic, nidaid bëdan secac dëyucash canias dadpen ëshëendac —quepanëdash Esus.

Aden chuibanashic: —Tantiate bédambocquidën ëmbi chuiboed tantiapec —quepanëdash.

⁹ Adoaquien: —¿Mitsipadquid tantiaid mimbi chuiboed icpec? Èbitedi tantiamequin chuioa —capanèdash abèd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nèbi mimbi tantiabenec. Padnuen utsibon tantienquio yaid aid iquec. Aden chiac:

“Èshë bédambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bédambocquid icquimbi tantiesa icquin ma abimbo chiaid tantienquiocpanuna”
—quepanèdash Esus.

¹¹ Aden chiashic: —Èmbi chuiboed nad iqueque. Tanti. Chuinu. Tiedën caniquid pete èshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantiash papuduedtiapimboesho Satansën bëpiscudmiaid adquid nec. ¹³ Cuënote dadpen samèdacno nidaidbimboecquid nadquid iquendac. Nuquin Papan chiaid tantiash, Bédambo iquebi, quiashic natiamianquiec cametequid icnuc aid tantiec Nuquin Papan chiaid papudueduidquid iquendac. ¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiash abi bunaid, abi nënaid, ambi natequid adquid tantiaquin Nuquin Papan chiaid bëtashacbimboec icnuc bédamboec tabadaid ismesa yampec. Aden bédamboec tabadaid ismesa yanuc utsin Nuquin Papan chiaid tantiatiapimbo iquendac. ¹⁵ Nidaid bédabimboecquidien nad iquec. Nuquin Papan chiaid tantiadonec bédamboec tabadquin utsi ismequidquio nec. Adquid natiamianquid chonoc tantesa uainquiocquin ènenquiocquin ismendac. Aden ismiac Esus tantiaquid utsi dadpen

yampec —quepanëdash Esus ambi chuiboed abëd icquido tantiamenuec.

Tabote nēnantan nanac chēnquiacbimboecquid

(*Mad 4.21-25*)

¹⁶ Aden chuishumbic naden Esusën chuiopanëdash: —Tabote taboshon matsun bētashesa. Adembidi tsadte tēdion tabote nanesa icbo nec. Ma ěmbi yuedaidon isnueshun nēnantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidēmbi chuibanendac. ¹⁸ Ad icnuc ěmbi chiaid bēdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bēdamboen tantiembi, qeshun papuduedmenquiocquin bēdamboen ismesa nec. Aden ambi tantiauidaid uesadendac —quepanëdash Esus.

Aton utsibo aton titabēd choaid

(*Mat 12.46-50; Mad 3.31-35*)

¹⁹ Adashic, Esus isec aton utsibobēd aton tita chopanëdash. Cho-choshon matses dadpen nuntan tabadsho isun, Ěbi choaid chuita, cac ²⁰ shubun puduedshun: —Titabēd min utsibo choshon umanucshun mibi cainec mibēd onquete bunquin —capanëdash Esus chuiquin.

²¹ Adoaquien: —Adquid chuinu. Tantia. Nuquin Papan chiaid tantiashun nabanquido ěbēd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

Acte tēccoasquesho ěnēdmiaid

(*Mat 8.23-27; Mad 4.35-41*)

²² Adashic: —Chian cuēma utsiuc nidnu. Nid —quianec abēd icquidobēd cano antsadtoanec nidpanëdash. ²³ Adec

nidec cano anuequi Esus ushtopanëdash. Adec ushnu-bien cunquequid dapa comapenec cunqueubi acte tëc-coasquequidën acte uemiac cano mentoadtsempanëdash. Adsho isash dacuëdec ²⁴ Esus ushacno nidshun tinec abëd icquido: —Nuqui mentoadeque. Isucun, Icbo —quec comapenec cuëdpanëdash abëd icquido. Adsho tanti-ash isucunash nidtoshon: —Mibi comapenec cunqueque. Ĕnëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ĕnëd —Esusën cac badedquio acte tëccoasquequid ënëdoapanëdash. ²⁵ Aden ënëdmetanec: —¿Atotsi quish ëbi tantien-quo yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëd-chitosh, quec abëd icquido abibi onquecuededpanëdash.

Mayan icsa dapuduedaid dapuduemequin bëdamiaid
(*Mat 8.28-34; Mad 5.1-20*)

²⁶ Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. ²⁷ Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. ²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ĕbi mëyanenda —quec onquenubien ²⁹ mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquo yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmédquid mibi ne? —capanédash.

Adoaquien: —Sinco midted dapuduedondaid nebi — quepanédash mayan icsa dapuduedaid onquec. ³¹ Aden chiashic: —Mibi bédambocquid cadoque. Ënenquiocquin mëyanacno cuidnuequin ëbitedi nidmenda —quiashic ³² chanco dadpenshun pec tabadsho isash: —Ëbitedi chanchotedi dapuedtiadquio iquebi. ¿Ada bédambo icpec? —quepanédash mayan icsa dapuduedaid.

Adoaquien: —Aido dapuedetan —Esusën cac ³³ dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibédquiec unësbunepanédash.

³⁴ Adsho isash chanco pemequin isquido titinquier shubu dadpen yacno choshon ambi isboed chuituidac ³⁵ anocquido istanu quianec Esus yacno chochopanédash. Adec choshon mayan icsa dapuduemequin bédamiaid dashcute dasiuidash bédamboen tantiec Esusën taëno tsadsho istuidpanédash. Adec aid onquesho isash anocquido, Uinsadpambo iquec, quish dacuëdcuededpanédash. ³⁶ Dacuëdsho isun mayan icsa dapuduemequin bédamiaid isquidon ambi isboed dacuëdquido chuipanédash. ³⁷ Aden chiac: —Nëuëshquio nidenquio icpec —quepanédash dacuëdquido Esus chiec. Adoac Esusbéd icquido canon antabëdtopanédash.

³⁸ Adsho isun: —Mibéd nidtiadquio iquebi — quepanédash ambi mayan icsa dapuduemequin bédamiaid Esus chiec.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanédash. Aid nidnubien mayan icsa

dapuduequin bēdamiaid nidanec aton shubu yacno choshon anocquidtedi Esusën naid abi mayan icsa dapuduequin bēdamiaid chuibanoapanēdash.

*Chido intac budaid bēdanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potiash cuēma utsiuc Cadidia yacno Esus padpidec chosho isash: —Mibi isec bēdambo iquebi —quepanēdash iccuededquido abi cainquido.
⁴¹ Adnubien, Nuquin Papan chiaid chuibante shubun tabadquid isquid Aido cuēmēdquid choash Esusën taēno uebudash: ⁴² —Con champi abentsēc tishaid unēsanequidquio iccosh. Aton seta 12ted icquid niosh. Ēbi cudasaid nec. ¿Aidi isnuec con shubuno ada nidtsia? —quepanēdash Aido.

Aden chiac Esus nidnubien cho-choquido dadpen tsucus-tsucustsēcquio yec Esus datsidadpanēdash.
⁴³ Adnubien, chido seta 12ted matamec intac budaid chopanēdash. Aidi dauēchoquid dadpenshun bēdametiapimbo icpanēdash. ⁴⁴ Adoac bēdanabi yec, Bēdamequidēn ēbi bēdamepec, abibi quianec Esusën cachoc choshon ismenquiocquin Esusën dashcute cuēmano mishnubi aton intac badedquio bēdampanēdash.

⁴⁵ Aden mishac: —¿Tsuntsimbini mishosh? — quepanēdash Esus. Aden chuisho tantiash abi datsidash capuquido mishambo yec otacquio tabadcuededpanēdash. Adec tabadnubien: — Matses dadpenshun tsucus-tsucustsēcquiocquin mibi cuēscabededec —capanēdash Petedon.

⁴⁶ Adoaquien: —Matses abentsēcshun ēbi mishosh. Ēmbi nadatiambocquin natequid bēuesadtsac — quepanēdash Esus.

Ducasën Dada uaid 8:4751Ducasën Dada uaid 8:56

⁴⁷ Adec Esus onquesho tantiash chido, Ambi tanti-acpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquiec mibi bëdanaye. Dacuëdenquo yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aited buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësquo yec shubisho tantiashun: —Mibi shubieque. Ènëdta. Champi unësenquo yec usheque —capanëdash Esusën.

⁵³ Adsho tantiashun, Champi unësacsho isombi, quequin Esus tantienquiocquin shubiquidon mamënshumbedpanëdash. ⁵⁴ Mamënshumbednubi Esusën Aido cuëmëdquidën champin mëdante mëdinquin: —Nidto, champi —comapenen cac ⁵⁵ aton tiboedte unësabi yec champi badedquo nidtopanëdash. Champi nidtosh isash: —Peme —quepanëdash Esus. ⁵⁶ Aton champi nidtosh isash: —Adopenshenda iquec —quepanëdash ani amëbëdi.

Adoaquien: —Mimbi isboed chuibanenda —
quepanëdash Esus.

9

Esusën ëbi chuibeneta, quequin ambi nidmiaido

(Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi nada-tiambocquin nabanacpaden mibitedishun nabanendac. Mayan icsa dapuduequinc daicsaido bédamequinc cain mibi capucueniacnoshon mimbi ismebenendac. ² Nëbi mibi nideque. Adec capucuequinc chuibenequimbi bédamebeneta. ³ Nidquin cueste uidën nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio niddan. ⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta. ⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidatte nec, quequin nidaid putu tasequequin ismeta — capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bédamebenepanëdash.

⁷ Adnubien Esusën nabansho isquidon Edodes chuibampanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiaishun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien; ⁸ Edias Nuquin Papan ambi chiaid chuimiampid padpidec choapash icnui, utsi-utsiec

quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoaquien: —Mambi uincuentiapimboconoc Uan mapi budtemiondac. ¿Tsudain ëmbi tantiacmaidquoio adobanquid icpec? —quiashic Esus iste bumpanëdash Edodes.

Matses dadpen pemiaid

(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibanansho tantias Esus abëd icquido bëyucanec shubu dadpen icquid Betsaida caid anoentsëqui nidpanëdash. ¹¹ Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

¹² Adashic ushë budtsan Esusbëd icquidombo Esusën dayunquoio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsho isunda cho-choquidtedi pemenuëquin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquoio icquimbi dadauidquoio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac ¹⁵ ambi chiacpadomboen tabadmepanëdash. ¹⁶ Aden tabadmesho isun panëmpi

5tedbëdta nuëcquid daëd sananquin abuc isec: —Mibi bëdambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid

(Mat 16.13-19; Mad 8.27-29)

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaïd, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaïd chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi capec? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaïdquio yec Quidistu caïd ma mibi neyoc —quepanëdash.

Abi unëste chiaïd

(Mat 16.20-28; Mad 8.30-9.1)

²¹ Adoaquien: —Mimbi ëbi tantiaïd nëbi utsi chienda —quepanëdash Esus comapenen chiec. ²² Aden comapenen chiaishic Esus: —Ëbi matsesaïd icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaïd chuibanquin tantiamequido yec quec aïdtedi ëbi

chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac — quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unës-manë quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquëc Nuquin Papa yacno nidenquio iquendac. ²⁴ Cuesunenu cac unësmanë quiash Esus tantiaquid nebi queboedi Esus tantiesä nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuequid icnuc adecbidi Esus tantiaquid nebi, queoapëc. Adquid unësash Nuquin Papa yacno tabadendac. ²⁵ ¿Atotsieshun Nuquin Papa yacno tabadaid tantienquio yec nidaidën bëdamboëc tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquëc. ²⁶ Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tantiäquiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid

(Mat 17.1-8; Mad 9.2-8)

²⁸ Aden chiashic Esus mëdante utsiuc tauadoëc ushash Nuquin Papa chiec onquenuëc macuësh yacno nidoapanëdash. Petedo, Uan, Acobo aidted buanëc macuësh yacno Esus nidpanëdash. ²⁹ Adec macuësh yacno nidash

Nuquin Papa chiec Esus onquenubi aton bësbed aton dashcutebëdi nac-nacquio ushë chënquiacbimboec icpanëdash. ³⁰ Adsho isnubien badedquoio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. ³² Adnubien Esusbëd choboedo abëd icquido 3ted ushcasmash tabadtuidquin Esusbëd utsi daëd nac-nacquiocquid dasiuidacbimboec bed-bedquesho isbededpanëdash. ³³ Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcncub shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd choboedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquoio, con madombo, ëmbi bëdamboen isaidquoio neque. Aidën chiaidquoio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapudedaid madompi

(Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash.

³⁸⁻³⁹ Cho-choash abentsëc nadpanëdash: —Con mado

abentsëc icquid mayan icsa dapuduedash icsambo ic-coshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëcbacushaniosh. Dapuduenenquio icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquio iccosh —quepanëdash dada abentsëc Esus caic.

⁴¹ Adoaquien ambi nianaïdo caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsi-ashini chieshtope? —quetanquin: —Min mado bec cho — Esusën cac aton mado aton papan bëpanëdash. ⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

Abi unëste chuioaid
(*Mat 17.22-23; Mad 9.30-32*)

⁴⁴ Adoaquien: —Chuinu. Bëpiscudenquiocquin tanti-aquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiaïd tantienquio iquembi, quetiapimbo yec otacquo tabadcuededpanëdash abëd icquido.

¿Tsutsi chuiquid dapa icpec? quequin chiaïd
(*Mat 18.1-5; Mad 9.33-37*)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecued-edpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoaquien Esus tantiaquidquio icquin bacuëmpi chomeshun aton dayunquio tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiapadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid

(Mad 9.38-40)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuec nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. ⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd

Ducasën Dada uaid 9:5359Ducasën Dada uaid 9:61

icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

⁵⁵ Adoaquien: —Padicnuna. ¿Matses unësmenuetabi chodio? —quianec ⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid (Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnom-bobi mibi tsibananec nidendabi —quepanëdash Esus databëdquid abentsëc.

⁵⁸ Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi: —Con pa unësacsho chococashun mibi tsibanec nidendabi, Icbo —quepanëdash.

⁶⁰ Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido

(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. ⁴ Ëbi chuibenec nidanequin mitsana buanenda. Mitsana bedtequidbëdta shictoachte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵ Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶ Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. ⁷ Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹ Ambobi tabadquin daicsaid bēdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰ Shubu dadpen yacno choshon mibi yuedquid nibēdsho isun aton podquedēn nidquin naden chuita: ¹¹ Nuquin Papan chomiaid mibi chuinuēc chobi. Ēbi daēdi yuedenquiocsho mibi chuitiapimbo iquebi. Adoac abi yacno ambi chomiaidēn mibitedi yuedtiapimbo iquendac. Nuquin Papan chomiaid tantiata bunesa mibi icsho isash mibi yacno capuec ēbi tabitacquiaid tabesquenu. Is, quequin ismequin adota —capanēdash Esusēn ambi nidmetequid 72ted icquido chuiquin. ¹² Aden chiashic aido chiec abi Esus onquec: —Naid icsabēdtabi naid bēda chuibante ushē chonoc mibi yuedesa Nuquin Papan comapenen cuidendac. Ēbi choabincuc Sodoma yacnocquido icpampic. Ēbi choabincuc aidon ēbi tantiatiapimbo icpampic. Adquido Nuquin Papan bēdiactsēc cuidendac —quepanēdash Esus.

¹³ Aden ambi nidmetequid 72ted icquido chuiban-shumbic utsibo isacbimboen Esusēn nadopanēdash: — Nēbi icquido, shubu dadpen icquid tantiec unēsquiocquin mibi chiembique. Tantiata. Shubu dadpen icquid Codasin caid yacnoshon ēmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ēmbi nasho isash ēbi tantiesa mibi icoapēc. Ēnden yampido isadaidpembon ēmbi nadatiambocquin nabansho isun, Icsaquid nebi, qeshun unēsquiocnoc shubiquin abi icsaid ēntsempampic. ¹⁴ Aden Tido yacnocquidobēdtan Sidon yacnocquidon tantiashun abi icsaid ēntsempampic. Adquido

Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. ¹⁵ Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacimboec onquec.

¹⁶ Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquio yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidaneapanëdash.

¹⁷ Adec nidanequin Esusën chiacpaden nabeniashic, Bëdambo iquebi, quecuededec Esus yacno chochoapanëdash. Adec cho-choash: —Mimbi chiacpaden nabanombi. Aden nabanquimbi, Esusën nadatiambocquin naidënquio dapudenta ëmbi caidtedi mayan icsa dapuduemposh, Icbo —quecuededpanëdash ambi nidmiaido 72ted icquido ambi naboed Esus chuibanec.

¹⁸ Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapudue-mebedednubi abi dëniacacimboecnuc bedquetanacimboec Satanabuc uesh badedquio paëdsho isec niobi. ¹⁹ Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adom-

boembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chome-nuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantia-sh, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadom-boen nadatiambocquin aidon nabededosh. Aden nabed-edshun chuisho tantia-sh bëdambo iquebi. Dadpen tantiaquido mimbi nadatiambocquin naid tantiamenquioc-quimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choboedouidtsëqui Esusën chuioa-panëdash: —Ëbi tantiaquido icquin ëmbi tantiamiac-paden mimbi nabansho isun Nuquin Papan bëdambo iquebi camiaido mibitedi nec. ²⁴ Nuquin Papan chiaid chiampidobëd ancanquid icampido mimbi nadatiamboc-

quin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bëdamboen naquidquio

²⁵ Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

²⁶ Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashunti-adquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸ Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹ Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuedquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanëdash.

³⁰ Adoaquien Esus: —Utsi chuinu. Tantiata. Edu-saden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. ³¹ Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³ Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin ³⁴ aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. ³⁶ Aden chuishumbic: —Ëmbi chuibloed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷ Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chuibloedbimboecnuc utsibo tantiaquin nashunoata —quepanëdash

Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëd-pactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. ³⁹ Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. ⁴⁰ Adec tsadquin Madian tantianubi Madtan ambi natiadquo yaidtedi tantiaquin nabampanëdash. Aden nabanequi Esus yacno chosho: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹ Adoaquien: —Mimbi natiadquo yaid dadpen tantiaquidquo mibi iqueque. ⁴² Èbi tantiaquidquo icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

11

Nuquin Papa chiec onquianete

(Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamëpanëdash. Adembidi Nuquin Papa chiec onqueta quequin ëbitedi tantiamëquin chuioa, Icbo —capanëdash.

² Adoaquien: —Nuquin Papabëd onquequin naden chuita:

“Bëdambocquidquo mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bédabon mimbi chiacpadomboenuidi naic.

Adomboembidi matses abitedishunquo napashun, Papa.

³ Tantiaquidquo, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴ Adecbidi utsin ëbi chieshënsho cuidenquo yec ëbi abi ic-said bëpiscudacpadquiequi ëbi icsasho cuidenquo yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, quequin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? ⁶ Inchëshpotsembo pete bedshunuec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meni-aid cuidquin adquidi mibi meneoaimbi,’ quepatsiac mibi mibëd nashunanquid caic.

⁷ “Adoaquien, nuntanuëshi: ‘Padi. Shëcnandombi. Con bacuë ishacunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquo. Mimbi nidenquiocquin chuidonesho tantiasun mimbi chuiboedtedi mibi menepatsiash —quepanëdash Esus.

⁹⁻¹⁰ Aden chiec abi onquec: —Adomboembidi Nuquin Papa chuidonesho mimbi bedtiadquo yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi

chuidonesho Nuquin Papan aton Mayan mibëd tabadmiaic aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? ¹² Adembidi, ¿Cachinan bacuë bec cho, queshoda mimbi chichun menedi? ¹³ Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiashun menenquioda mibi ictic? —quepanëdash Esus.

Bedtsibun namiaid Esus nec, quequin chiaid
(*Mat 12.22-30; Mad 3.19-27*)

¹⁴ Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash. ¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

¹⁶ Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷ Aden chuisho tantiash tantiaquidquio yec abi icsamboen chuimenuequido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸ Adembidi, Bedtsibu cashumbic Satanas

caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiatic abëd icquido nibëdenquioda ictic? ¹⁹ Bedtsibun tantiamiaid nec, mimi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquo mibi icpe? ²⁰ ¿Nuquin Papan tantiamiac mayan icsa dapuduemequid ëbi yec ambi chomiaidquo matses chuiquid dapa mibi yacno ënden choabida ictio? — quepanëdash Esus abi chuimequido chiec.

²¹ Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²² Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemboed mayan icsa dapuduedoaid

(Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh.

²⁵ Adec nidshun abi dapuduemboed naden istuidposh.

Mayan icsa nidan, Ĕbibi bēdambo iquec. Adash bēdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemboed choshon aid abentsēcquo ²⁶ istuidashic nidoashun abipadquid chuituidac utsi 7ted abēdi choash abitedi dapudedcuededac dada icsamboshē yamposh —quepanēdash Esus.

²⁷ Aden Esusën chiambien iccuededquid chido: — Mibi tishacsho shuma chishmiondaid Nuquin Papan bēdamboen isaid icpec —quepanēdash Esus caic.

²⁸ Adoquien: —Aden nasho padenquo. Nuquin Papan chiaid tantishun nabansho Nuquin Papan bēdamboen isaidquo nec —quepanēdash Esus chido caic.

Onasën ismiampicpaden ismiaid

(Mat 12.38-42; Mad 8.12)

²⁹ Adnubien abi yacno cho-choash utsi dadpen iccuededsho isun Esusën nadopanēdash: —Nēbi nidaidēn tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiaid mimbi isendac. ³⁰ Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantish, Abimbo chuiquid nec, qeshun abi icsaid Ninibe yacnocquidon embededpampic. ³¹ Utsibic, Nuquin Papan dadpen tantiamiaid, Sadomon iquec qesho tantish chuiquid dapa chido Sadomonēn chiaid tantianuec ēnapenuēsh choshon tantish, Abimbo iquec, quepampic. Nuquin Papan matsesën naid icsa ambi naid bēdabēdta chuibante ushē chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bēdamboen tantiaquin chuiquid dapa Sadomon icmepampic. Abitedi

tantiampidquio nëmbobi iqueque. Ĕmbi chiaid tanti-
ata. ³² Adembidi, matses icsaidbēdta ambi bēdamboen
naid Nuquin Papan chuibante ushē chonoc Ninibe yac-
nocquidon Onasën chiaid tantiacpadomboen Nuquin
Papan chiaid abimbo iquec, quequin tantienquio ic-
sho Nuquin Papan mibitedi isendac. Nuquin Papan
chuiyac Onasën chuisho Ninibe yacnocquidon tantiabe-
dedpampic. Onas Nuquin Papan matses icsaid cuidte
chuiyaidquio icpampic. Padnuen mibi icsaid bedshu-
nash abided cuidadtequid nëmbobi iqueque. Ĕmbi chiaid
tantiata —quepanēdash Esus abibi chiadequi.

*Tabote taboshon bētashenquio yac bimboec abi bēdamboec
tabadaid ismequid*

(Mat 5.15; 6.22-23)

³³ Aden chuishumbic Esusën abi chuibanec: —Tabote
taboshon ompoesa. Adembidi matsun bētashesambo icbo
nec. Ma Ĕmbi yuedaidon isnueshun tabote nënantan
nanquid. ³⁴ Adoaidbimboec min tantiate iquec. Min
tantiate bēdamboecquid icquin bēdamboec tabadquin is-
mequid mibi nendac. Bētashac bimboec min tantiate
icnuc icsamboen ismequid mibi nendac. ³⁵ Con icbo
Ĕbi bednuec choec queshun bēpiscudenquiocquin isted-
istedta. ³⁶ Min tantiate icsaisa icsho Nuquin Papan chi-
acpadomboen tantiaquidquio aidi nec, quequin utsibon
mibi isendac —quepanēdash Esus.

Nuquin Papan icsamboen isaidquio

(Mat 23.1-26; Mad 12.28-40; Duc 20.45-47)

³⁷ Aden Esusën chuibanshobien padiseyobo abentsēc-
shun: —¿Ada Ĕbi yacno pec nidtsia? —capanēdash. Adoac
aidbēdi nidash pete sanaid cuate dayunquio Esus tsad-
budpanēdash. ³⁸ Adec Esus tsadsho isash, ¿Adpecshenda
iquec. Penush mēpamēdenquio Esus icpec? quec abibi

onquequin padiseyobon Esus yuedquidëmbi tantiapanëdash.

³⁹ Adoaquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec.

⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquioda icpampic. ⁴¹ Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac — quepanëdash Esus.

⁴² Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. ⁴³ Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Èbi

bëquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. ⁴⁴ Adembidi, matses unësaid chococate manenushe qeshun ismequin mabiunu, quenquio yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

⁴⁵ Adoaquien, Nuquin Papan naden nata quequin chiaid tantiembi, quiaish utsibo tantiamequid abentsëc: —Padiseyobo chuiquin ëbipadquido mimbi chuiiopec —quepanëdash.

⁴⁶ Adoaquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aiteded matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacbimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec.

⁴⁸ Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiacbimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec. ⁴⁹ Ëmbi chiacpaden chuibanta, cabicquin naden Nuquin Papan chuipampic. Ëmbi chuimiaid utsi-utsien aton matsesën mëyampec. Utsi-utsien mëyanshun cuesunepec, quec Nuquin Papa abitedi tantiaquidquio adpampic. ⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido

icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. ⁵¹ Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

⁵² “Nuquin Papan naden nata quequin chiaid tantiemi, qeshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³ Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash. ⁵⁴ Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Èbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiemi, quequin tantiaquin Esus chuimepanëdash padiseyobon.

12

Natiamantequidbëdtabi dayacmetequid
(Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. ² Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. ³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

⁴ “Adembidi chuinu. Tantiata. Mibi cuesunenequid dacuëdënenda. Adquidën mibi cuesunequin mibi nibëdametiapimbo iquendac. ⁵ Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta. ⁶ Nuquin Papa tantiaquid yec dacuëdënta. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. ⁷ Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

*Esus tantiaquid nebi, quequin utsibon tantianubi chiaid
(Mat 10.32-33; 12.32; 10.19-20)*

⁸ “Abi chiembique. Tantaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. ⁹ Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bédabo chiendambi. ¹⁰ Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquo yacbimboec bëpiscudta, Papa, qesho tantiash aidën icsamboen chienquo yacbimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquo iquendac.

¹¹ “Adembidi chuinu. Tantaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹² Nuquin Papan Mayanën mimbi chuibante mibi tantiamequé —quepanëdash Esus abëd icquido caic.

Aton na dadpen icquidën tantiaid icsa

¹³ Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴ Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. ¹⁵ Aden aid chuishumbic utsibo chuiquin nadopanëdash: —Con na

dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

¹⁶ “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: ¹⁷ ‘Con tiedën caniquid bacuë dadpen iqueque. ¿Atontsimbimbi aidtedi dayun uapeba?

¹⁸ Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquio con tiedën caniquid bacuëtedi sandoshon dayun uanuna.

¹⁹ Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onquesh.

²⁰ “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh — quepanëdash Esus.

²¹ Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec — quepanëdash Esus.

¿Atotsimbi napeba? quesa icta, quequin chiaid

(Mat 6.25-34)

²² Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsibi dasiuidpeba? quec dacuëdenda. ²³ Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. ²⁴ ¿Uicchunënda ambibi cuëte ëshë siac bacuëacsho chepadic? Padenquio.

Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵ Adecbidi, ¿mibi unëste ushë abimbo chonoc, Padi, quepecta mibi icti? Padenquo. ²⁶ Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

²⁷ “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquo. Adoenquo yaid aton bacuë ictequid bëdaidquo iquec. Cuëtempi bacuë ictequid bëdaidquo yacpadquid chuiquid dapa Sadomonën dashcute adquo ictiapimbo icpampic. ²⁸ Padnuen cuëte bacuë ictequid bëdaidquo icboedi badedquo sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquo ictsiash quequin Nuquin Papa bëdiactsëc tantienda. ²⁹ Aden tantienquo yec ¿Atotsimbi peshun aque? quec dacuëndenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquo icquin pete actequidbëdta ëbi bedmedonec, quequin tantiec tabadta. ³¹ Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquo yaid mimbi bedendac.

Abi yacno choacsho meniaid
(Mat 6.19-21)

³² “Nuquin Papan abi yacno mibi chomeque. Dacuëndenda, ëbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin

mimbi nabanuc Nuquin Papa yacnoshon menetequid mit-sana chodquetemaid iquendac. Ampequidën bedtemaid-quo iquendac. Capishton petemaidquo aid iquendac. ³⁴ Mimbi tantiaidquo mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

Chieshenquiocquin caintequid

(Mat 24.45-51)

³⁵⁻³⁶ Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidac-chobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. ³⁷ Aden abi cainquido aton icbon bëdambo icmequin nadopec: “Ëmbimbo mibi pemenu. Nëmbo tabadec cho,” qeshun ambi yuaido icbonquo pemequin bëdambo icmendac. ³⁸ Adembidi, icbo inchësh-potsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac. ³⁹ Adquidpenquo icbo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquo ictsenobi, quependac icbo. ⁴⁰ Adquiecbidi ampequid choacbimboec Nuquin Icbo choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

⁴¹ Aden Esusën chuisho tantiaash Petedo: —¿Utsi chuiquin mibëd icquidouidi tantiamenuenda chio? ¿Abitedi tantiamenuenda chio? Tantianu. Ëbi chui —quepanëdash Esus caic.

⁴² Adoaquien: —¿Icbon chiac mitsipadquiocquin ambi namiaido bēdamboen napeba? Adquid chuinu: Pete tambanshun musucshun ěmbi namiaid utsitedi bēdamboen menebanta, quequin ambi namiaid utsi abentsĕc chianec icbo nidac. ⁴³ Adec nidashic choshon ambi chiacpaden ambi namiaidĕn chieshenquiocquin nabanacsho isun icbon bēdambo icmiaid nendac. Adquid naden chuipec: Ĕbi nidan chieshenquiocquin mimbi nabanoque. ⁴⁴ Ĕmbi namiaid utsibotedi ěbipadquiocquin chuiquid icta. Adquid icquin con natedi dayun uata, quequin chiendac icbon. ⁴⁵ Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshĕnquin cuesbanshun ambentsĕqui nua peshun tantienquio yanquin aquec. ⁴⁶ Aden nabanquin tantienquiocnoc aton icbo choshon ambi namiaidĕn icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac. ⁴⁸ Aton icbo bunaid tantiabicquidĕn cuesmetiadquiocquin nabansho aton icbon bēdiactsĕc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac —quepanĕdash Esus.

*Utsibĕd bēdamboec tabadnu quesa icquin cuĕshĕdmequid
(Mat 10.34-36)*

⁴⁹ Aden chiashic abi onquec: —Ĕbi tantiaquid icnuc ěbi tantiesa yec cuĕshĕdendac. Aido ĕnden cuĕshĕdondan ěbi tantiaquidombo bēdamboec tabadtsiandac, quec tsadebi. ⁵⁰ Adecbidi, Yuecshun ěbi unĕs uanun mĕyantequid iquendac, quequin tantiec, Ĕnden

mëyanon daid iquec abuc Nuquin Papabëd tabadtsiandabi, quec tsadebi. ⁵¹ ¿Nidaidëns hun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. ⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. ⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin, aton champi ëbi tantiaquid icnuc aton tita padenquio yec cuëshëdendac. Shubu utsin aton chaya ëbi tantiaquid icnuc aton babanën padenquio yec cuëshëdendac. Shubu utsin, aton babanën ëbi tantiaquid icnuc aton chaya padenquio yec cuëshëdendac —quepanëdash Esus. Abi tantiesa cuëshëdtequid chuibanec.

Nuquin Papan ismiente isun nad iquendac, quequin tantiaid

(Mat 16.1-4; Mad 8.11-13)

⁵⁴ Aden abëd icquidombo chuishumbic Esusën naden iccuededquido chuioapanëdash: —Inchësh chosho isec, Ue choec, quiacpadec choec. ⁵⁵ Adecbidi, ushë chënquec chosho isash, Chumbo yampec quiacpadec iquec. ⁵⁶ Aden isquin mimbi ëmbi nidaidëns hun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

Utsibëd chushcananquid

(Mat 5.25-26)

⁵⁷ Aden chiashic: —Utsibëd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiashun mibi icsaid ënenquio ique?
⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi pudenti-apimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intabëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

² Adoquien: —¿Cadidia yacnocquido utsitedi icsaid daëdpactsëc icnuc cuesunemiaindo icsaid dadpen icsho aido cuesunemiash, quequinda mimbi tantiape?

³ Icsamboen mimbi tantieque. Mibitedishun mibi icsaid ënta utsibo unësmiacpaden unësminushe qeshun.

⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaid uebudquin abëd icquido 18ted cuesac unë-sosh, quiosh. ¿Edusaden yacnocquid utsibo icsaid daëd-pactsëc icnuc Sidoe yacnocquido icsaid dadpen icquid unësosh, quequina mimbi tantiape? ⁵ Mimbi icsamboen tantieque. Utsibo unësacpadec unësmane quequin mibitedishun mibi icsaid ënta —capanëdash Esusën abi chuimeboedo chuiquin.

⁶ Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. ⁷ Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choidobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi nesh-cashunquid aton icbon chiosh.

⁸ “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatan-quin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash. ⁹ Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaid bëdamaïd

¹⁰ Adashic, chonoadtëmaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien ¹¹ seta dadpen 18tedi matamequin mayan icsan shuabudaid icpanëdash. ¹² Adquid icsho isun Esusën: —Shuabudaid icboedi nëbi cacueoaid mibi

iquendac, chido —cashun ¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bédamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

¹⁵ Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte yacno buanenuioda mimbi icpe? ¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

¹⁷ Aden Esusën chuisho tantiash, Adenda, quequin bëdamboen chiombi, quetiapimbo yec otacquoio tabad-cuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(Mat 13.31-32; Mad 4.30-32)

¹⁸ Adashic: —¿Nuquin Papan shubun icquido mitsipadquidquio icpec? ¹⁹ Nadquidquio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën tantiabenash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(Mat 13.31-33)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? ²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi — quepanëdash Esus.

Pudued-puduedtequid shëcuë pistsëcquio chiaid

(Mat 7.13-14, 21-23)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. ²³ Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tiantanu. Ëbi chui.

Adoaquien Esusën nadopanëdash: ²⁴ —Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoaquien: ‘Ëbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

²⁶ “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icbo chuipec.

²⁷ “Adoaquien: ‘Icsaquido mibi neque. Nëmbo puduedenda,’ quepec Icbo. ²⁸ Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icbo yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. ²⁹ Nuquin Papa yacno abi tantiesa puduedtiapimbocnobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. ³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus unësquitequid

(Mat 23.37-39)

³¹ Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³² Adoaquien: —Edodes cuesunemenuecbimboec onquequidquo nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. ³³ Adobanequi nëbi capuebi. Adobanequi badiadash capuoaiibi. Adobanequi abadiadash capuoaiibi. Adobanequi Edusaden yacno capuoaiibi. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiaido cuesunequido mibi nec. Adem-

bidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshënquid choec, qeshun nua shoccotsëcshun aton bacuë cudasquin mabësec aton podon. Adembidi: Mibi chieshënquid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc.³⁵ Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshënec cuesunenuquido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquio nec, quequin tantienquiochoedëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnuequin padiseyobo utsibo tabadquin caimbededpanëdash. ² Aden caimbedednubien podo nidte chedo bidisquiaid uano tsadsho isun Esusën: ³ —¿Chonoadtemaid ushën daic-sambocquid bëdamenquiocte ushë nec, quequina mimbi tantiape? —caquien ⁴ abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: —Nidec nid —cac bëdambo yec nidpanëdash.

⁵ Aden aid nidmeshun abi bëdamenushe quequin caimbededquido caic: —¿Chonoadtemaid ushën nua uëdëshcaidën min baca ampaëdacsho isun badedquio

bedtanquin indoenquioda mimbi ictsia? —quepanëdash Esus. ⁶ Aden chuisho tantiash adquiobidi otacquo tabad-cuededpanëdash.

⁷ Adashic, tsusiobon dayunquo tsadsho isash, Chuiquid dapa nec, utsibo quetsiash, quec padiseyobo chochoec, quequin tantiashun Esusën nadopanëdash: ⁸ — Pec cho, cac choshon tsadte bëtinenta. Tsadte mimbi bëtinambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabada,” icbon cac icsamboen naombi quiash natiaic uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. ¹¹ Chuiquidbimboecsho isplashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹² Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoudi pec cho cainda. Aido pemiac, mibi pec cho caoic. ¹³ Pemenu, quequin aton na nibëdquido, daicsaidobëdta bëshuaido pec cho cata. ¹⁴ Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶ Adoquien aidi tantiamenuen utsi chiacbimboec Esus nadpanëdash: —Yuednu, quequin nadënquo pec chota,

quequin ambi yuedtequid dadpen chuiposh. ¹⁷ Ambì chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. ¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

¹⁹ “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbameposh.

²⁰ “Utsibic: ‘Con chido bedombique. Nidenquio iquebi,’ queposh.

²¹ “Aden chuisho tantiash nidshun aidon chiacpaden aton yuan icbo chuioposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chui-boedo bëombi. Aido icnubi abi tabadte iquec,’ queposh yua.

²³ “Adoquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴ Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

Esuspadquio ictequidquio

²⁵ Adashic, nidsho matses dadpenshun tsibanac abi choacmi bidiadshun isec Esus nadpanëdash: ²⁶ — Èbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid

iquec ëbipadquoio ictiapimbo icoaic. ²⁷ Unësmame quiaſh mëyanac dayactiapimbocquid ëbipadquoio ictiapimbo icoaindac —quepanëdash Esus.

²⁸ Aden chieç Esus abi onquec: —¿Shubu uanu, queſhun abia ſhubu uaid iſec, Nëidtenquoio nanu, queſhun aitedquibidi bëſhun toccashun ſhubu uainquioda icpec? ²⁹ Aden tantienquiocquidën abentſe-abentſen bë-bëtsëcquin baded naintiapimbo iquec. ³⁰ Adſho iſun utſibon mamënſhumpec. Bëdamboen iſun ſhubu uaquidpadquid, Eſuſpadquoio icnu, queſhun ëmbi chiaid bëdamboen tantiabenaſh adquibidi icpec. Èbi tantiauidtsëcquid ëbipadquoio ictiapimbo iquec.

³¹ “Adembi chuinu. Tantiata: ‘Mibëd icquidobëd cueſnanuec chuiquid utſi nëmbo cho-choec,’ queſho tantiaſhun nëmbobi icquido chuiquidën naden tantiapec: ‘Èbëd icquido daëdpactſëc iquec. Aitedtsëqui iquec dayacquiocquid icquin chuiquid utſi abëd icquido cuemepec, queſhun ma chobono,’ quequin caimpec. ³² Padnuen, abëd icquido dayactiapimbo icſho iſun chuiquidën: Chuiquid utſi bëquedtanta. Bëquedſhun, Mibëdi ictſiabi. Èbëd icquido chuiquid icta, ëbi chuiquid quioſh, quequin chuita, quequin chuipoſh. ³³ Adembidi ëbipadquoio icnuequidon bëdamboen tantiata. ¿Èbi chuiquid Esus nec, quequin ambi chiacpadendambi nabampeba? Ai, adonona, queſhun adota. Adoſea, Eſuſpadquiocquid nebi, quenda —quepanëdash Esus abi tsibananquido chieç.

*Sa batapentſëcquiocquid
(Mat 5.13; Mad 9.50)*

³⁴ Aden chiſhiç Esus nadpanëdash: —Sa batambo iquec. Caſecac utſibëd daëdash batambo iquec. ¿Sa batapentſëcquiocquid caſecac batamboda icpadic?

³⁵ Padenquoio. Secatequid adquid nendac. Adecbidi Esuspadquoio icnu quiash ëbipadquoio yanesa chian anëdënquequid nësiatequid nendac. Adquid ictiapimbo iquebi, quequin, Tantianu, qeshun tantiacpadomboen nabanta —quepanëdash Esus.

15

Obeca abentsëc bënudtequid

(Mat 18.10-14)

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantianu, quiash Esus datsidadpanëdash. ² Adsho isash padiseyobo Esus tantiamenquoio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³ Adoaquien, tantiaquidquoio iquec Esus: ⁴ —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibë nec nidenquioda mibi icpe? ⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipéc. ⁷ Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

Aton na bedtequid bënudtequid

⁸ Aden icbon aton yua bënudaid chuishumbic utsi chiecc Esus nadpanëdash: —¿Aton na bedtequid shocoshëmpi

10ted icboedi abentsëc nibëdsho isun tabote taboshon bescaquin chidon nibënenquioda icpec? ⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰“Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi ¹² tsyuec tishaid aton papa caic: ‘Tsusio budquin mimbi chiondacpaden nëbi ëbi aited meneta, papa,’ quepondash. Adoac aton na musucshun aton mado abi daëdi menëbampondash.

¹³“Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. ¹⁴ Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash.

¹⁵ Adec bundoquiec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. ¹⁶ Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

¹⁷ “Adec natiambo bunec tabadquin aton papa ambi nianonaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. ¹⁸ Nëbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique. ¹⁹ Adquid icsho con mado nec, ëbi

cainda, papa. Nēbi min yuapadquid ēbi icme,' quequin chiemi,²⁰ abibi quianec aton papa yacno nidoapondash. Adec nidec ancuenquo yacno aton mado nidondaic case-nash chosho isash unēsquiocnoc aton mado bēquedquin dayumbudshun shubi uatanquin aton papan tanchocapondash.²¹ Adoac ambibi tantiabocpaden aton papa chuiquin: 'Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ēbi cainda, papa. Min yuapadquid ēbi icme,' capondash aton madon.

²² "Aden chiaquien bēdambo yanshun ambi namiaidombo naden aton papan chuipondash: 'Con mado ēnden nidondaic choashe. Dasiuidte bēdaidquo bēshun con mado dasiuinta. Adoshombic mēusudtetsen mēusunta. Adoshombic tapucudtetsen tasiuinta.

²³ Adoshombic, bacan bacuē nuacquid dapa bedshun cuesuneta nuquitedi bēdamboec tabadquin penun.²⁴ Con mado unēsacimboecboedi nēbi ēbēdi tabadoaic. Aidi bēnudacimboecboedi nēbi istuidacimboec choash iquec,' cac bacan bacuē cuesuneshun codocacsho pebededpondash.

²⁵ "Adnubien bēyuc tishaid tied nantan icpondash. Auēshquo nidec shubu anoentsēqui choquin tentencate cuēdēmec matses cuēdēnsho tantiatuidpondash.²⁶ Aden tantiatuidashien aton papan namiaid istuidash: '¿Atotsi naic nec?' quepondash bēyuc tishaid.

²⁷ "Adoquien: 'Min utsi ēnden nidondaic choaposh. Aidi chosho isash unēsquiocquin nuquitedi bēdamboec tabadquin pemenuquin aton bacan bacuē nuacquid dapa papan cuesunemiosh,' cac²⁸ bēyuc tishaid nēishash shubun puduedenquo icpondash.

"Adsho isash, Puduedenquo iccosh, quequin chiac bēyuc tishaid yacno nidshun: 'Min utsibobēd bēdambo

icnuec cho, mado,' capondash aton papan. ²⁹ Adoaquien: 'Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰ Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,' quequin bëyuc tishaidën aton papa chushcapondash.

³¹ "Adoaquien: 'Mado, ëbëd icquid mibi nec. Adquid icnuc con natedi mitsana neyoc. ³² Min utsi unësacbimboeoboedi nëbi choash tabadoaic. Aidi bënudacbimboeoboedi nëbi istuidaid nec,' quequin aton papan choboedën buchi chuipondash —quepanëdash Esus.

16

Icbon na icsamboen isquid

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ² Adoac, ambi con na ista caid chomiash icbo nadposh: 'Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' queposh icbo.

³ "Aden chiac icbon na isquid otacquio onquec: '¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. ⁴ Naden natsiambi. Con icbon na meniondaid abitedi cuidmenquio yac ëbi yuedtsiash,' queposh.

⁵ "Aden tantiashun ambi icbon na meniondaid abentseabentsen chomiac bëyuc choquid chuiquin: '¿Tedtsi

ëmbi con icbon na meniaqui mimbi cuidenquiocpaccoc?
caquien:

⁶ “ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷ “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoquien: ‘Mimbi aidted bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

⁸⁻⁹ “Aden dada uabansho isun dada uatempitedi bedshun icbo yacno nidshun meniac isbanec icbo tanti-aquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuiipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin

adomboembidi aton na dadpen icsamboen isbanoaindac. ¹¹ Adembidi mimbi nidaidëshun bedquin mimbi icsamboen nabansho isun, ¿Ëbi tantiaquid bédamboen ista, quequinda Nuquin Papan mibi chuipeba? Padenquio iquec. ¹² Adembidi, ¿utsin na isquin bédamboen nashunenquio icsho isun abi yacno chosho isun mibi menependa ictic? Padenquio.

¹³ “Adecbidi, chuiquid daëd icnuc aid daëdshun nami-aidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanëdash Esus.

¹⁴ Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. ¹⁵ Adec tabadsho isun Esusën: —Bédamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bédamboen naquidbimboecsho matsesën ispashuni, quequin tantiaquin nasho Nuquin Papan bédamboen isti-
apimbo iquec.

¹⁶ “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. ¹⁷ Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid
(*Mat 19.1-12; Mad 10.1-12*)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

Aton na dadpen icquid icnubien aton na nibëdquid

¹⁹ Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acposh. ²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. ²¹ Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

²² “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi ²³ chian anëdënquiac-noshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. ²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

²⁵ “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. ²⁶ Adboedi, uquëmbo mibi iquéc cuëma utsiuc potetemaïd icnuc nëuëshquio nidtiapimbo iquéc. Adquiobidi mibi yacnocquido nëmbo chotiapimbo

icoaic,' quequin Abadauanën aton na dadpen icboed chuiposh.

²⁷ “Adoquien: ‘Ëbi yacno potetemaïd icnuc con pan shubu yacno Dasado nidme. ²⁸ Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe queshun Dasado aido chuimetanta, papa,’ queposh aton na dadpen icboed.

²⁹ “Adoquien: ‘Nuquin Papan chiaïd, Moisesën dada uampidbëdta dada uaid utsi isec tsusiobo onquepayoc. Aden chiaïd ma min buchi adon tantiaquiopanuna,’ quequin Abadauanën chuiposh.

³⁰ “Adoquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

³¹ “Adoquien: ‘Padicnuna. Nuquin Papa tantiesa icquin uincuemiaidën chiaïd min utsibon tantienquio icpatsiash,’ caposh Abadauanën aton na dadpen icboed chuiquin —quepanëdash Esus.

17

Matses icsaid chiaïd, ambi Esus tantiaïd chiaïd, ambi natequid chiaïd

(Mat 18.6-7, 21-22; Mad 9.42)

¹ Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. ² Adquid ëbi tantiabenabicquid icsa uanabicsho cuënote yuëmbocquid tëtanetanquin acte shodomboshë yacno nënepatecnëdan. ³ Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ quesho tantiash

aidi icsainquo yac bimboec bēpiscudta. ⁴ Mibi icsamboen nash choec: ‘Icsaobique. Ēnēdnuna,’ quenuc mibi icsamboen nacmaidbimboec yec bēpiscudta. Mibi padpiden icsamboen nash choaic: ‘Icsaobique. Ēnēdnuna,’ queoanuc mibi icsamboen nacmaidbimboec yec bēpiscudoata. Mibi padpiden icsamboen nash padpidec choec: ‘Icsaobique. Ēnu,’ queoanuc aitedecbidi aidi icsamboen yenuc yac bimboec bēpiscudoata —capanēdash Esusēn abēd icquido chuiquin.

⁵ Adoaquien: —Nuquin Papa nadatiambocquin nabanquidquo nec, quequin tantiaquidquo ictiadquo iquebique. Adquid ēbi icme, icbo —capanēdash abēd icquidon Esus chuiquin.

⁶ Adoaquien: —Cuētempi ēshē mostasa caid pist-sēcquo iquec. Siac dēyucash nua yanec. Adecbidi Nuquin Papa nadatiambocquin nabanquid iquec quequin mimbi bēdiactsēc tantiapec. Aden bēdiactsēc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nēid cuētempi caic, Cuēte mananuc tabadboedi adquiecbidi acte nantan tabadoata, quequin mimbi chiacpadec acte nantantsen abi tabadacpadebidi tabadoaindac —quepanēdash Esus.

⁷ Aden chiashic Esus abi onquec: —ĴMin yua mimbi neshcata cac nidshun neshcaquin nainash shubuno chosho isun: “Nēmbo tsadquin pec cho,” caquinda mimbi icpe? ⁸ Padenquo. “Con pete codocashun ēbi pemeshun acte menetanquin mimbitsen peshun acta,” mimbi caic.

⁹ Aden mimbi chiac mimbi chuiboedtedictsēqui nabanquin mimbi yuaidēn naimbudec. Aden naimbudsho isash: “ĴBēdamboen mimbi naoc,” quecta mibi icpe?

¹⁰ Padenquo. Ambembi nainquo iccosh. Mimbi chiacpaden min yuan nabanosh. Adembidi Nuquin Papan

chuiboedtedtsëqui nabanash Nuquin Icbo caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac —quepanëdash Esus.

Daushumbocquido bëdamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëqued-tuidpanëdash. ¹³ Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

¹⁴ Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic ¹⁶ Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpembo nepanëdash.

¹⁷ Adoaquien: —¿Diestededambi bëdamepo? —quepanëdash Esus dëbidiadanec choaed caic. ¹⁸ Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquio icpec —quepanëdash Esus. ¹⁹ Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

Chuiquid dapabëd bëdamboec tabadte chote ushë
(Mat 24.23-28, 36-41)

²⁰ Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquio nuqui ispeque? Tantuanu. Ĕbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac. ²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: —Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac. ²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. ²⁴ Nuquin Papa yacno bëdamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. ²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

²⁶ Aden chiec Esus abi onquec: —Ĕndenquimboshë Noe tabadnuc matsesën icsamboen tantiadedtantiadednëdaccpadomboen ëbi choate ushë icnuc adembidi matsesën tantiadenepec. ²⁷ Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid

ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacimboecquid nëdënquetequid ue sequiacimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰ Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. ³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec nidenquio yec badedquio cuenta. ³² Mibi yacnocquidtedi unës uanushe bidiadshun isenquio yec cuenta, cac Dod cuenubien aton na tantiec aton chido aucbidi bidiadsho unës uampidpadquid iquenda. ³³ Unësmane qeshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo

tabadendac. ³⁴ Ēbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. ³⁵ Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. ³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷ Aden chuisho bëdamboen tantienquiocquin abëd icquidon: —¿Mitsimbo budpec, icbo? —capanëdash.

Adoaquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

18

Cadonequidquio chido chiaid

¹ Adashic, Ēbëd icquido chieshenquio yec Nuquin Papa chiec onquian-onquianquidquio ma icpanu quec aido tantiamenu quec Esus nadpanëdash: ² —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. ³ Adnubien uano tabadquid niente chido icposh. Aidi icsambocquid cuidte chuiquid yacno nidshun: ‘Ēbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiocboedëmbi chido ënëdenquio yec ⁵ choded-chodedquin adomboembidi chuioasho tantiashun: ‘Nuquin Papabëdta matses tantiesa nebi, quequimbi niente ënëdenquio yec chodednesho isun uimabudmane

qeshun abi icsamboen naquid cuidte chuiquiono,'
qeshun cuidte chuiquidën chuiquioposh.

⁶ Aden chiashic Esus: —Choded-chodedquin chidon chuiasho tantiash: “Mibi icsamboen naquid cuidte chuinu,” queposh icsambocquid cuidte chuiquid.
⁷ ¿Adomboembidi ambi cuënaidon, Èbi chieshënquid cuidta, quequin chuidoniac, Cuidnu, quenquoda Nuquin Papa icpec? Ai, adendac. ¿Nëbimbobida cuidpeba? ⁸ Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? — quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹ Adashic, bëdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: ¹⁰ —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. ¹¹ Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tanti-acpaden naden Nuquin Papa chuioposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choaed, ancanquidën utsin na bedtequid bedmianiaidpadquidpenquio nebi, Papa. ¹² Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin

abentsëc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Ĕbi tantiaquin pauc, Papa,’ queposh —quepanëdash Esus.

¹⁴ Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yac bimboec, Bëdamboquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuoaindac —quepanëdash Esus.

Bacuëbo Esus yacno bë-bëaid

(Mat 19.13-14; Mad 10.13-16)

¹⁵ Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶ Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec.

¹⁷ Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid

(Mat 19.16-30; Mad 10.17-31)

¹⁸ Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquo icquin ëbi chui. Tantuanu —capanëdash Esus chuiquin.

¹⁹ Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. ²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹ Adoaquien: —Canidotsëcquimbi aden nadeniondambi —quepanëdash nëbi caniquid.

²² Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno niden-dac. Aden meniash ëbëd iquec chota —quepanëdash Esus.

²³ Aden Esusën chuisho tantiash aton na dadpen tantiec unësquo yanshun Esusën chiacpaden natiapimbo icpanëdash. ²⁴ Adsho isun: —Aton na dadpen tantiaquin Nuquin Papa badedquo tantiatiapimbo adquidën iquec. Nuquin Papa tantienquo yec abi yacno puduedtiapimbocquid iquendac. ²⁵ Adquiecbidi shëcuë pistsëcquid puduedte nidaidën capuquid dapan badedquo tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquo tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

²⁶ Aden chuisho tantiash iccuededquido nadpanëdash: —¿Tsutsi Nuquin Papa yacno puduedquid icpec? — quepanëdash Esus caic.

²⁷ Adoaquien: —Matses ambibi tantiacpadec puduedtiapimnoc Nuquin Papambien abi yacno yuedanquid matses tantiamendac —quepanëdash Esus.

²⁸ Adoaquien Petedo: —Mibëd icnu, quequin ëbëd icquidbëdtan con natedi nianondambi, icbo —quepanëdash Esus caic.

²⁹ Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chiec.

Ëbi unës uaindac, quequin Esusën chiaid

(Mat 20.17-19; Mad 10.32-34)

³¹ Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. ³² Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamënshumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac. ³³ Adoaqui daëdec ushtanec uincuenendabi —quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquo yec tabadpanëdash.

Bëshuaid bëdambiaid

(Mat 20.29-34; Mad 10.46-52)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuë-mambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

³⁶ Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash.

³⁷ Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun: ⁴¹ —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Ëbi bëucshune, Icbo —capanëdash.

⁴² Adoaquien: —Mimbi tantiacpadomboen padpidemboen is —cac ⁴³ badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash. ² Edico yacnocquid Saqueyo cuëmëdquid

icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³ Adoaid icquimbi utsi, Esus cuenec, qesho tantias, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tantia, Icbo. Nëbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” qesho tantiasun ëmbi ampiaidbëdta daëd-daëdquiecnuc daëd uaqin menebanembi —quepanëdash Esus chiec.

⁹ Adoquien: —Chian anëdënquequid nësiatsemboedi aton tsusedpa Abaduan yanampicpaden tantiaquid Saqueyo yanacsho nëbi mënchicaid iquec. ¹⁰ Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. ¹² Aden tantianubi tanti-aquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid icti-adquiocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵ “Adoalui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ;tedtsi daëd uapashba? abibi qeshun ambi meneboedo chomeposh.

¹⁶ “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

¹⁷ “Adoaluen: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

¹⁸ “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹ “Adoaluen: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

²⁰ “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo.

²¹ Mitsana bedtequid mimbi tantiactedimbo daëd uati-apimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

²² “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimboesho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? ²³ ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

²⁴ “Aden aton na daëd uaisa chuishumbic iccued-edquido chuiquin: ‘Ëbi chieshëinquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵ “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

²⁶ “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷ Adembidi ëbi chieshënec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

*Chuiquid dapabimboec yec Edusaden yacno Esus choaid
(Mat 21.1-11; Mad 11.1-11; Uan 12.12-19)*

²⁸ Aden chuibanashic Esus Edusaden yacmi nidequi anoentsëqui choash nidtuidpanëdash. ²⁹ Uano macuësh

Odibos caid potsembo shubu daëdpactsëc icquid Bed-paque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: ³⁰—Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsad-abicquid tënëshaid mimbi istuidendac. Aid istuidshun tënëshaid tēchicshun nēmbo bëta. ³¹Aden chicsho isash: “¿Atotsi canun mimbi aid chicpe?” quepec. Adsho tantiaishun: “Con Icbo bunaid nec,” quequin chuita —quepanëdash Esus.

³² Adoac nidshun istuidtanquin
³³ cabayobitsecquidēmpi tënëshaid tēchicsho isash:
 —¿Atotsi canuen aid tēchique? —capanëdash icbon.

³⁴ Adoaquien: —Con Icbo bunaid nec —qeshun Esus yacno nimbanchin abi tënëshaidën buampanëdash Esusbëd icquidon.

³⁵ Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsad-umpanëdash. ³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸ —Nuquin Papan chomiaid ambi chuiquid dapa icmi-aid ambi bëdambo icmiaidquiobidi nec. Nuquin Papa yacno abëdi bëdamboec tabadequi icsaisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoaquien: —Ëmbi naid chiec aitedi cuëdcuededen-quiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. ⁴³ Yucash choquin uimanëmëncuidon mibi cuentiapimbo cnoc tsicatebudcuendac. ⁴⁴ Aden mibi tsicatebudcuenshun min bacuëbobëdtabi naimbudquin mibi unës uashun nendac. Min shubutedi nibëdquiendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemi-aid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash. ⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën

puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. ⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquo isadaidbon Esus cuesunemenuen bedtiapimbo icpanëdash.

20

¿Tsundan chuibanta caid mibi ne?

(Mat 21.23-27; Mad 11.27-33)

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ² Cho-choshon: —¿Tsundan chuibanta caid mibi neque? Tantianu. Ëbitedi chui —capanëdash.

³ Adoquien: —Ëmbia tantianu. Ëbi chui. ⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquo mibi quenuc, ¿Matsesën nata caidta nepondash, quequinda mimbi tantie? — quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantiash Esus nadpendac. ¿Atotsieshun Uanën chuisho mibitedishun tantienquo icponda? ⁶ Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimaid, Uan icpondash, quequin iccuededquidon tantiec — quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi — quepanëdash tsusiobo.

⁸ Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid
(*Mat 21.33-44; Mad 12.1-11*)

⁹ Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰ ‘Tiedën caniquid ënden bacuëpash. Ëbi neshcashunquidën musucaid con na bedmenu,’ queshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh. ¹¹ Adoshombic, icbon aton tied yacno ambi namiaid utsi nidmeoposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. ¹² Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

¹⁴ “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵ Aden cuesunian icbo unësan aton natedi nuquin na ictsandac,’ quecuededshun tied

tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec? ¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquio icpashun —quepanëdash iccuededquido. ¹⁷ Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu uanuequidën isuidaid buintad utsin ambia nitsinaid icposh.” ¹⁸ Buintad sec uebudec podquëd-podquëndendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac —quepanëdash Esus.

¹⁹ Aden Esusën chuisho tantiash: —Nuqui naid chi-acbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid

(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaid-pembo ancaquidën Esus bedpashun, quequin tantiaquin nidmepanëdash. ²¹ Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid

abimbo chuibanquid mibi nec. ²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash: ²⁴ —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

²⁵ Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, quesho meneta. Nuquin Papan naden nata cac adobanta —capanëdash Esusën. ²⁶ Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquio tabadcuededpanëdash.

*Uincuen uaid chido bedesa nec, quequin chiaid
(Mat 22.23-33; Mad 12.18-27)*

²⁷ Adashic, saduseyobo caido yec ²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. ³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi. ³¹ Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. ³² Yuecash chidotsen unësoaposh. ³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë

icpeque? Ĕbi chui. Tantianu —quepanēdash saduseyobo Esus caic.

³⁴ Adoaquien: —Nidaidēnshun dadan aton chido bedec. Adecbidi, Min bēnēbēd nidta, quequin aton papan chiac aton champi aton bēnēbēd nidec. ³⁵ Uincuen uate ushē choan Nuquin Papan bēdamboen isaido abēdi tabadquin chido bedenquio iquendac. Adembidi, aton champi menenquio aton papan iquendac. ³⁶ Adecbidi, Nuquin Papan uaido mayan bēdabo unēsesa yacpadquiequi Nuquin Papan uincuen uatequid unēsenquio iquendac. Nuquin Papan uincuen uatequido aton bacuēbo nendac. ³⁷ Adembidi chuinu. Tantia. Cuētempi nēdēnquiacbimboecquid isun Moisesën dada uapampid nec. Cuēte nēdēnquiacbimboecsho isun Nuquin Papa chuiquin nadopampic: “Tsusedpa Abadauanēn papa cain cuēnaid mibi nec. Adecbidi tsusedpa Isaquēn papa cain cuēnaid mibi neoaic. Adecbidi tsusedpa Acobon papa cain cuēnaid mibi nec,” quequin Moisesën chuipampic. ³⁸ Moisesën tsusedpabo ambi chuiboed ēnden unēsampidēn nami chodquiaidēn papa cain Nuquin Papa cuēntiapimbo iquec. Aton nami chodquiash abi tantiaquidquio icquin tantiec tsadquidēn papa cain Nuquin Papa cuēnec —quepanēdash Esus saduseyobo chiec.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanēdash: —Bēdamboen mimbi chuibanoc —quepanēdash Esus chiec. ⁴⁰ Aden Esusën chuisho tantiashun Esus chuimetiapimbo utsibo icpanēdash.

*¿Tsuntsin mado Quidistu nepec? quiaid
(Mat 22.41-46; Mad 12.35-37)*

⁴¹ Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? ⁴² Dabidën ambibi Sadmo caid dada uaquin naden chuipampic:

“Icbo utsi yec con mado mibi chiembique. Tanta, quequin chiec icbo dapa nadpampic:

‘Ëquë con dayun abiucquio cainec tsadec cho

⁴³ ma mibi chieshënquidtedi mimbi namiaid ma icpanu,’

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënquido caic.

Naden nata quequin chiaid tantiamequidpadquid iquenda, quequin chiaid

(Mat 23.1-36; Mad 12.38-40; Duc 11.37-54)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda. ⁴⁷ Aidon bëdamboen nabanacimboen nianten natedi bedbanec. Aidombidi

Nuquin Papa abimbo tantiacimboec yuen chiec onquec. Aden bédamboen nabanacimboecquido Nuquin Papan comapenen cuidendac. Adoesa bēdiactsēc cuidendac — quepanēdash Esus abēd icquido chiec.

21

Nianten piucquid shocoshēmpi meniaid

(Mad 12.41-44)

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbampanēdash. Ambi isaido Nuquin Papa tabadte shubu nacnemetē cuidnu, quequin menequin aid shubun shocosh tabēcaidēn aton na bedtequid utsin-utsinquien sandobedpanēdash. Aton na bedtequid dadpen icquidon dadpen sandobededsho isquimbi ² nianten aton na nibēdquidēmbi aton na bedtequid shocosh daēd ictsēcquid sandosho ispanēdash. ³⁻⁴ Adosho isash: —Chuinu. Tantia. Nianten aton na bedtequid abitedimbo sando-posh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daēdpactsēc menequido nec, quequin Nuquin Papan aido isoaic —quepanēdash Esus.

Abitedi naimbudte ushē choec quequin chuite

(Mat 24.1-35, 42-44; Mad 13.1-37)

⁵ Adashic, Nuquin Papa tabadte shubu uashunaid-bēdtabi matsesën dectanaid didiquesho isec: —Nuquin Papa tabadte shubu bēdaidquio iquec —quepanēdash utsibo.

⁶ Adoaquien: —Mimbi nēbi isaid yuecash nidbēdquien-dac. Matses utsibon nēid shubutedi chic-chicbudendac — quepanēdash Esus.

⁷ Adoaquien: —¿Mitsipadēn Nuquin Papa tabadte shubu uashunaid chic-chicquin tauapēc? ¿Aid ushē

anoentsëqui yanuc mitsipadquid ismiente icpeque? Tantiyanu. Chui —quepanëdash utsibo.

⁸ Adoaquien: —Cho-choshon muaquin chuisho tantien-quiocata. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. ⁹ Adecbidi: “Cuesnancuededec,” qesho tantiasch dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

¹⁰ Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹ Adecbidi, nidaid utsi-utsiec yacno canchednuec ishcut-ishcutendac. Adecbidi, utsi-utsiec yacno bunquiotte iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucuësh natiambo icsho mimbi isbededendac.

¹² “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³ aidotsen tantiaquid yantsiash qeshun ëbi chuibanta. ¹⁴ Aden buanaqui, ¿atotsimbi ancanquid cape? quequin tantiec tsadenda. ¹⁵ Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. ¹⁶ Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. ¹⁷ Èbi

Ducasën Dada uaid 21:18-19 122 Ducasën Dada uaid 21:27

tantiaquid chieshënquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquo yec, Esus tantiaquid nebi, quequid icta. Adquid iquec unësash ënëdenquo yec Nuquin Papabëd mibi tabadendac.

²⁰ “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimbi tantiendac. ²¹ Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquo cuempanuna. Adecbidi, dëuequido Edusaden yacno ma nidenquiocpanuna. ²² Aid ushë icnuc Nuquin Papan chiacpadomboen cuidtequid iquendac. ²³ Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquecbidi comapenec dacuëdec matsestedi tabadcuededoaindac. ²⁶ Adecbidi, uispa utsi-utsiec paëdtedpaëdtednubi utsi-utsiec tididiquendac. Adsho isash matses dacuëdec padishendac. ²⁷ Adnubini Nuquin Papan chomiaid matsesaid ëbi dasiuidaid bëchomauanquiec

ushë chënquiacbimboec uëshëmbo yec nadatiambocquin nabanquidquo abu ushun ëbi budsho matsesedishun isbededendac. ²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bédambocquin abuc isteneta —quepanëdash Esus.

²⁹ Aden chuishumbic ambi chuiboed ushë chote tantiamenuen nadopanëdash: ³⁰ —Cuëtempi bacuëacsho isash, Ënden suc seccuduquiac nëbi seta taëec, quequin mat-sesën tantiec. ³¹ Adembidi ëmbi chuiboed icsho isun, Nuquin Papabéd tabadte ushë choec, quequin mimbi tantiec. ³² Abimbo chiembique. Tantia. Ëmbi chuiboed naimbudabicnuc con tan matses isadaidbo naimëdbudenquo iquendac. ³³ Abubëdta naimbudtequid nidaid nendac. Ëmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquo yec capusho badedquo siac cuentiapimbo iquec. Adembidi, Natiate ushë choec, quequin tantienquo yec chieshquin badiadquidën-badiadquidënkuien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsesedi cuidte ushë choenda ictic? Ai, aid ushë choendac, quequin caimbudec bédamboec tabadta. ³⁶ Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquo ëbi icme, Papa. Adembidi natiambocquin cuidte ushë chonoshe qeshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquo ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënkuien Nuquin Papa tabadte shubu uashunaid yacno nidshun matses tantiamenuen Esusën

chuided-chuidedpanëdash. Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash. ³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(Mat 26.1-5, 14-16; Mad 14.1-2, 10-11; Uan 11.45-53)

¹ Adashic, nami uabicquid pete tantiate ushë, Pascuas caid, anoentsëqui yampanëdash. ² Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bednquio icpanëdash. ³ Adnubien Udas cashumbic Iscadiote caid Esusbëd icquid dapudedshun Satanasën tantiamiac ⁴ Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵ Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶ Adoquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembali, quequin isted-istedpanëdash Udasën.

Ënquin nidaidënshun Esusën pebanaid

(Mat 26.17-29; Mad 14.12-25; Uan 13.21-30; 1Cod 11.23-26)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. ⁸ Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹ Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹² Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

¹⁴ Adashic, inchëshën choash abëd icquidobëd pete sante cuate dayun uequi Esus: ¹⁵ —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi. ¹⁶ Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷ Adoshombic dëshote sananec Nuquin Papa chiec onqeshun actanquin abëd icquido menec: —Në, aniactse-

aniactsen acban mibitedishun. ¹⁸ Tiedën caniquid ënë nidaidënsun padpiden aquenquo iquendambi. Nuquin Papa yacno choash tabadquidobëdtambi ashunquo aque-ndambi —quepanëdash Esus.

¹⁹ Adoshombic, pete bedshun Nuquin Papa chiec on-queshun cuësh-cuështanquin menebanquin: —Mibi ic-said bedshunacsho ëbided cuidquin mëyanquin cuesuni-aid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menede-niac. Aden cuesunaidën intac siquec unëso isun, Obeca cuesuneboed ëbi icsaquid icsho cuidnushe queshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshu-nash Esuseded ciudadac, quequin tantiatequidquo nen-dac. ²¹ Ëbi chieshënquido ëbi bedmenuequin chuiquid pete sante dayun ëbëdi uec. ²² Nuquin Papan chiampic-paden ëbi matsesacsho unës uaid iquendac. Ëbi chieshën-quido bedmenuequin chuiquid comapenen cuidte iquen-dac —quepanëdash Esus.

²³ Aden Esusën chuisho tantiaash abëd icquido: — ¿Midacquidien capec? —quecuededpanëdash.

²⁴ Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanam-panëdash. ²⁵ Adec chushcanansho tantiaash Esus nad-panëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. ²⁶ Mibitedi adquid iquenda.

Nadquidquio icta. Chuiquid nebi, quec tsyuec caniq-uidbimboecquid icta. Chuiquid icquin utsi namiacpaden nabanta. ²⁷ Abi pemequid abi nashunquid nec. Adem-bidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. ²⁸ Èbi chieshënquido icnuc ëbi nianesa ²⁹ icsho con Pan ëbi chuiquid icmiacpadquid chuiquid mibitedi icmendambi. ³⁰ Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

Esus ëmbi isacmaid nec, quequin Petedon chiaid

(Mat 26.31-35; Mad 14.27-31; Uan 13.36-38)

³¹ Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantannique ëbëd icboedi mibi cuëshëdmetiadquio iquec. ³² Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuad-nushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³ Adoaquien: —Mibi caic, Quënën nauednu, quenuc mibëdi naudedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

³⁴ Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: —Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

³⁶ Adoaquien: —Ënden adquid buanenda, queboedi, Ëbi nibëdnuc mitsana bedtequid shictoachtebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adem-bidi buanta, caimbi nëbi. ³⁷ Nuquin Papan ëbi chuiquin dada uamiampid nad iqueque. Tantia. Chuinu: “Ic-sambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadom-boembi nëbimbobi naimbudembi —quepanëdash Esus.

³⁸ Adoaquien Esusën chuiboed tantienquio yec abëd icquido: —Në, chështe daëd iqueque. Is, Icho —quepanëdash.

Aden abëd icquidon tantienquiocsho isash: —Ai, padi —quepanëdash Esus.

*Macuësh Odibos caid yacnoshon Esusën Nuquin Papa chiaid
(Mat 26.36-46; Mad 14.32-42)*

³⁹ Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. ⁴⁰ Adec nidequi abi tabadteniacno choshon Esusën: —Chieshëmënnquidën ëbi namete bunac-paden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin.

⁴¹ Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantiash bunenquio

yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. ⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: ⁴⁶ —¿Atotsi quiaash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: ⁴⁸ —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec ⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bëdamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec,

queshunda utsin-utsinquien chështe sananubi utsin-utsinquien cueste sananec cho-chopec? ⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(*Mat 26.57-58, 69-75; Mad 14.53-54, 66-72; Uan 18.12-18, 25-27*)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash.

⁵⁵ Adec choec umanuc cuëte dëtsiadaoaid cuëec utsibo tabadacno Petedo cuëte cuëec tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

⁵⁹ Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queapanëdash.

⁶⁰ Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash

⁶² unësquio yec umanuc nidash Petedo shubiquiopanëdash.

Esus sondadon mamënshunaid
(*Mat 26.67-68; Mad 14.65*)

⁶³ Adshumbic Esus cuenushe queshun abi isquidon, sondadon, Esus mamënshumbedequin cuesbededpanëdash. ⁶⁴ Adoshombic, dashcute cuëshaidën bēpucshun cuestanquin Esus sondadon nadopanëdash: —Mibi tanti-aquidquio icquin ¿midaquidën mibi nēbi cuesequē. Tanti-anu. Chui —capanëdash Esus chuiquin. ⁶⁵ Aden cuesbedequin Esus icsamboen chuipanëdash.

Isadaidbo tsusiobo yacno Esus buanaid
(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buanshun ⁶⁷ nēnantanquio nidtomesho isash: —Nuquin Papan chomiaid, Quidistu caid, nebi, quecta ique? Tanti-anu. Chui —quepanëdash isadaidbo tsusiobo Esus caic.

Adoaquien: —Ĕmbi abimbo chuisho mibitedishun tantienquio iquendac. ⁶⁸ Adembidi, ¿Mitsipadquidquio Nuquin Papan chomiaid neque? Tanti-anu. Ĕbi chui, cac ěbedenquio mimbi iquendac. ⁶⁹ Nad iqueque. Chuinu. Tanti-a. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tanti-amequin chiec.

⁷⁰ Adoaquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo

iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquio iquembi ut-sibo chuiquin. Adquid iquec, quequin nuqui tantiec — quepanëdash isadaidbo tsusiobo.

23

Pidato yacno Esus buanaid

(Mat 27.1-2, 11-14; Mad 15.1-5; Uan 18.28-38)

¹ Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoшон Esus bedshun Pidato yacno buampanëdash.

² Aden Pidato yacno Esus bëec choash: —Esusën chuiban-sho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec — quepanëdash Esus.

⁴ Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiaméoaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷ Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edu-saden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec ⁹ Esus chuimenu quec Edodes on-quepanëdash. Adoaqui Esusën ëcbedenquio icpanëdash. ¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. ¹¹ Adoac Edodesbëd sondado Esus icsamboen chuiquin mamënsumbededshumbi chuiquid dapan dashcutebim-boecquid abichobicquid Esus dasiuinshun Pidato yacno buameoapanëdash. ¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(Mat 27.15-26; Mad 15.6-15; Uan 18.39-19.16)

¹³ Adashic, isadaidbo tsusiobobëdta isadaidbo utsibo chomeshun ¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aibëdi onquiash, ¿Cuëshëmianquidta nedic? quendabi. ¹⁵ Aden ëmbi tantiacpadomben tantiaquin Edodesën ëbi yacno chomeoaposh. Esus unës uainquioctiadquidi nec. ¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi

Pidaton nidmetsiash, quequin tantiec isadaidbo naded cuëdcuededquin: ¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. ¹⁹ Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

²⁰ Adec isadaidbo cuëdcuededsho tantiasch Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiasch: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantianu. Ma unës uainquioctiadquidi neyoc. Aden tantiaquin mëyameshun Esus nidmimbi —quepanëdash Pidato.

²³ Adoquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

²⁴ Adoac iccuededquidon chiacpaden namenuc

²⁵ Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënuquido chuiquin.

Esus mëyanaid

(Mat 27.32-44; Mad 15.21-32; Uan 19.17-27)

²⁶ Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash.

²⁷ Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. ²⁸ Adec chidobo abi tsibanec shubisho tantiasch bidadshun isec Esus: —Ëbi tantiec shubienda,

Edusaden yacnocquidon chidobo. Mibibi tantiadec min bacuëbobëdta tantiec shubicuededta. ²⁹ Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.” ³⁰ Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiastianqueque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹ Èbi buansho isec shubiequi, Èbi mëyantequid ushë choec, quequin tantiesa mibi icpec. Nëdënquenuioctiadquidi achuëshquiocquid nëdëncasho isash: “¿Tanunquiocquid badedquio nëdënquenuio icpec,” quecta mibi icti? Adembidi: “Cuidenquioctiadquidi nec,” queboedëmbi èbi icsaisa unës uasho isash: “¿Èbitedi icsambocquid comapenen cuidenquio icpec,” queoaspecta mibi ique? Ai, quequin tantiatiad —quepanëdash Esus.

³² Adnubien Esusbëdta icsambocquid dada daëd nidmequimbi ³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴ Dectanac diadequi Esus Nuquin Papa caic: —Èbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampanëdash.

³⁵ Adnubien matses dadpenshun isnubi Isadaidbo tsusiobo isec tabadquin mamëshumbededec: —¿Utsi-

utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

³⁶ Adembidi sondadon mamënshumbedequin paëm-bocquid mucambocquid sananquin Esus ismequimbi: ³⁷ — Isadaidbo chuiquid dapa iquec unësenquio iquebi, quiaash nëid bednush bud —capanëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onquesho tantiaash aibdëdta dectamboed utsi: —¿Aidi unës uatequid yapadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹ Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoaquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

Esus unësaid

(Mat 27.45-56; Mad 15.33-41; Uan 19.28-30)

⁴⁴ Adec onquenubi ushë cuembo yanuc bëtinacbimboec inchëshquio yashic ushë budtsan chënquedoapanëdash. ⁴⁵ Inchëshquio icnubi Nuquin Papa tabadte shubu

uashunaid yacno puduedtemaid quënën dashcute bitsi-pambocquid tsincabudquin dectanëdaid tembi daëdquio yec canchedbudcuempanëdash. ⁴⁶ Adnubien unësbudec comapenec cuëdec: —Mibi yacno ëbi yuedta, Papa — quiash Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash.

⁴⁸ Ambo tabadquin isquid utsibo Esus unëso isash unësquio yec aton shubuno nidanepanëdash. ⁴⁹ Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(Mat 27.57-61; Mad 15.42, 47; Uan 19.38-42)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. ⁵¹ Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. ⁵² Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash. ⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaïd chucanquio Esus Osen badedquio nauedpanëdash. ⁵⁴ Inchëshbudtsëqui seis yanuc chonoadtemaid ushë nec, queshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd choqedon chidobon tsibanshun shëcuën Esusën dada Osen nauedsho aidon isbededpanëdash. ⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiacpadec tabadpanëdash.

24

Esus uincuente

(Mat 28.1-10; Mad 16.1-8; Uan 20.1-10)

¹ Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. ² Ambo choshon Esus nauedshun bëtashaid cuënote shëcniacsho isashi ³ shëcuën puduedash aton Icho Esusën dada nibëdsho isec tabadpanëdash. ⁴ Adec tabadnubien dada daëd dashcute dasiuidac bimboec dasiuidash chënquéc chopanëdash. ⁵ Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaid nibëne? ⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? ⁷ Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoabi,” quequin Esusën chiondash —quepanëdash dada daëd chidobo caic. ⁸ Aden chiac chidobon Esusën chiaid abi bëpiscudaaid padpiden tantiapanëdash.

⁹ Aden tantiash Esus nauedaid shëcuë yacnoësh pudue-
nanec Esus tantiaquid dadpen tabadacno choec pudued-
shun ambi isboedbëdtabi ambi tantiaboed chidobon
chuibampanëdash. ¹⁰ Madia shubu dadpen icquid Mac-
tada caid yacnoshon tishaid yec Uana yec Madia utsi Uam-
bëdtan Acobon tita yec chido utsibo yec quec choshon
Esusën Ēbi chuibeneta caido chuipanëdash. ¹¹ Aden
chuisho tantiash: —Mimbi chiaid tantiatiapimbo iquebi —
quecuededpanëdash iccuededquido. ¹² Adnubien Petedo
nidtoanec titinquec nauedaid shëcuë yacno choash shue-
budquin shëcuë anisquin dataniaid dashcuteuidi uesho
ispanëdash. Aden isanec nidequi: —¿Atodain nechitec?
—quepanëdash Petedo tantienquio yec.

Emaus yacmi nidte
(Mad 16.12-13)

¹³ Adashic abi ushëmbi Edusaden yacnoësh utsibobëd
iccuededboed dada daëd shubu daëdpactsëc icquid Emaus
caid yacno nidpanëdash. ¹⁴ Adec nidequi ambi Edu-
saden yacnoshon isboedbëdta ambi tantiaboed chiec on-
quepanëdash. ¹⁵ Aden chiec onquec nidshobi Esusën
aid daëdi chinunash aidobëd nidpanëdash. ¹⁶ Aden abi
chinuntuidsho isac utsibimboec Esus isadpanëdash.

¹⁷ Adec nidequi Esus: —¿Atotsi chuibanec onquec nide?
—quepanëdash. Adsho tantiash unësquio yec mamënen-
quio yec nidtuidpanëdash.

¹⁸ Adec nidtuidash Quëdeyopas cuëmëdquid: —
¿Edusaden yacno tabadtuidquin anoshon naboed
mimbiuidtsëqui tantiamboda icco? —quepanëdash Esus
caic.

¹⁹ Adoaquien: —¿Atotsi naid chiec ne? —quepanëdash
Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papan bédetan matses dadpeshun bédamboen isaid icposh. ²⁰ Nuquin tsusio dapabobédetan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. ²¹ Nèbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. ²² Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac ²³ nibëdosh. Ambobi icnubi Nuquin Papan uaido mayan bédabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. ²⁴ Aden chidobon chuisho tantienquoio yec ëbëd icquido Esusën dada nauedbocono nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc. ²⁶ ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. ²⁷ Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

²⁸ Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun: ²⁹ —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi ue-

quin pete bedshun Nuquin Papa chuishun cuësh-cuëshun Esusën menebampanëdash. ³¹ Aden nasho isun badedi, Esus nec, quequin tantianubi Esus nibëdquio yampanëdash. ³² Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: ³⁴ —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. ³⁵ Aden iccuededquidon chuisho tantiashun Emaus yacnoësh choabod daëdshun Esusën abi chinunshun chiaidbëdta ambi pete bedshun Esusën cuëshbamboed chuiapanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

³⁶ Adec onquecuedednubi nënantanquio choshon Esusën: —Nuquin Papan bëdamboen isaido yec dacuëdenquio yec tabad —capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash. ³⁸ Adsho isashien Esus: —¿Atotsi quiash, ¿Esusida nepec? mibitedi quepe? ³⁹ Con mëdantebëdta con taë is. Èbibi nebique. ¿Mëtoccaid taëbëd chiüë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

⁴⁰ Aden chuitanquin abi bëchun shuin mëtoccaid chiüë aton mëdantebëdta aton taë Esusën ismepanëdash. ⁴¹ Aden ismiac, Aidquiobi nec, quenquio yec abëd

icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien ⁴² nuëcquid shëaid cuëshë menepanëdash. ⁴³ Aden meniac bedshun Esusën pepanëdash abëd icquidon isnubi.

⁴⁴ Aden piash: —Mibëd icquimbi naden chuiquimbi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuec. ⁴⁵ Aden chuishumbic abëd icquido tantiamequioquin: ⁴⁶ —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqi daëdec ushash uincuenendac. ⁴⁷ Aid tantiaashun mibi icsaid mimbi ënsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac. ⁴⁸ Mëyanquin unës uaqi ëbi uincuenacsho mibitedishun ispoc. ⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

Esus abuc indote
(*Mad 16.19-20*)

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bëdamboen ista, Papa —quepanëdash Esus. ⁵¹ Aden chiacsho abëd capucenequido niamequin Esus aton Papan abuc

indopanëdash. ⁵² Aden indosho isash, Ĕbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. ⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nited-nitedquin Nuquin Papan naid chuidenepanëdash.

Padi. Aidedtada uombi, Teyopido.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

